

社320

88

第二



八旗通志初集卷之一百五十一

名臣列傳十一

正黃旗滿洲世職大臣六

喀蘭圖 兄額爾格爾珠珥  
子察渾

安珠瑚 父阿喇穆

布恕庫 父那爾泰 族孫敦達禮  
敦達禮子桑格

沙納哈巴圖魯 子穆爾泰 費揚古

達爾化 覺羅德爾錦

吳勒 查弼納

定壽 祖祁郎阿 永國



穆占

喀蘭圖滿洲正黃旗人。世居蒙古嘉叟兒地方。初隸蒙古正黃旗。任頭等轄。順治二年。以係

太宗文皇帝眷顧舊臣。授牛錄章京世職。七年。九年。三

遇

恩詔。加至二等阿達哈哈番。先是睿王攝政。

世祖章皇帝幸其邸。隨

駕內大臣及轄員不滿二十人。喀蘭圖慮有不測。急歸

家。持弓矢追從。扈

駕回宮。十年。

世祖追憶其事。嘉其扈從功。

賜十丁之莊一。鞍馬全副。銀五百兩。加世職爲一等阿達哈哈番。改隸正黃旗滿洲固山。後緣事降世職爲二等。仕至內大臣理藩院尙書。康熙十年五月。以老乞休。奉

旨喀蘭圖効力年久。勞績素著。著解尙書任。以內大臣上朝。仍加太子太保。十二年卒。

予祭葬。加祭一次。諡壯敏。兄額爾格爾珠。崇德二年。隨睿王多爾袞等征明。敵兵犯我饒藍旗。噶布什賢西特庫營汛。卽同噶爾瑪擊敗之。六年。隨大兵征明圍錦州。與噶爾瑪及衆轄等敗松山

敵兵。錦州城內兵出犯。又同噶爾瑪擊敗之。七年。征松山。掘壕爲長圍。明經畧洪承疇騎兵來犯。同噶爾瑪又擊敗之。順治元年。隨睿王多爾袞入山海關。擊敗流寇。以功授牛錄章京。世職七年。遇

恩詔。加一拖沙喇哈番。以疾卒。弟喀蘭圖之子察渾襲拜他喇布勒哈番。兼一拖沙喇哈番。後復兼襲父喀蘭圖二等阿達哈哈番。併爲三等阿思哈尼哈番。康熙十三年。從征逆藩耿精忠。至江西。與賊力戰陣亡。

賜祭葬如典禮。

安珠瑚。滿洲正黃旗人。姓瓜爾佳氏。世居蘇完地方。父阿喇穆。初任分得撥什庫。陞牛叅章京。往招阿舒墨爾根。降其二十人而歸。又從大兵戰於商顏哈達。松山。察哈爾寧遠等處。身被重傷三十餘處。得功牌。并馬匹銀兩布帛等物。順治元年。隨睿王多爾袞追勦流寇。力戰陣亡。卹贈拖沙喇哈番。以兄之子席特庫襲職。遇七年恩詔。加授拜他喇布勒哈番。席特庫卒。安珠瑚始襲職。遇順治九年兩次。

恩詔。加授爲三等阿達哈哈番。安珠瑚兼通滿漢文。選人翰林院。任檢討。順治九年。大兵征湖廣。自請隨征。授刑部郎中。擊賊有功。十一月。敬謹親王尼堪歿於陣。都統宜爾德令安珠瑚往覓王尸。冒險前進。竟得尸以還。是役在事官并俱議罪。惟安珠瑚免議。十四年。復從征浙江舟山。以功加二等阿達哈哈番。十六年。以病解刑部郎中任。十八年。病痊。隨征東將軍季什哈等。征山東賊于七。破其黨呂士奇高奇山等。康熙二年。調叅領。六年。陞寧古塔副都統。尋調守吉林烏喇。

十四年。察哈爾布爾尼叛。欲掠烏喇。安珠瑚創設木礮爲防禦。賊至西爾旦嶺。聞有備。乃遁去。十七年。

聖祖特諭。安珠瑚實心辦事。殫謀竭慮。誠爲稱職。將扎努喀等各姓。新滿洲。及席北等。編爲牛錄。使人各得所。於國大有裨益。深屬可嘉。著加世職。爲一等阿達哈哈番。又一拖沙喇哈番。是年陞奉天將軍。

賜元狐裘紫貂朝衣玉帶鞍馬。旣至奉天。巡視邊界。題請展邊界二十餘里。橫亘數千里。立木柵爲隘口。設兵防守。改定大路於高阜處。移驛於舊都。視巡海洋。聞有明故將毛文龍所遺兵丁子孫。潛居海島。并招撫來歸。題請編設佐領。拔壯者爲水師。又添築奉天外城。屢奉

溫旨。二十二年。以疾乞休忤

旨。銷去本身所得官。以原襲拜他喇布勒哈番。在吉林烏喇地方効力行走。二十三年。隨都統公彭春。往征羅察。黑龍江將軍薩布素。委爲前鋒。章京掠圖虎魯河有功。二十四年。復隨彭春攻雅克薩城。降六百餘人。以功授索倫地方總管。督率索倫打虎兒等。於墨爾根波爾多開墾田畝。三

十二年。以年老致仕。

布恕庫。滿洲正黃旗人。本姓文車亨氏。後

賜姓爲吳魯氏。世居葉赫地方。父那爾泰。自幼以從征有功。授半個前程。順治六年。從征大同。叛鎮姜瓖戰歿。時那爾泰二子噶達渾。那什庫。亦在行間。見父死。并奮鬪歿於陣。是時布恕庫獨以壯尼大。隨征江西。叛鎮金聲桓。攻饒州府。不用雲梯。以第二人登城。十五年。從征貴州。至涼水井。敗僞侯李成蛟等。以功授拖沙喇哈番。是年歸京師。擢章京。值宿左翼門。一夕

世祖章皇帝欲幸上駟院。呼令啓門。布恕庫守門不從。翌日。下慎刑司議罪。鞭一百。尋傳至景山。

世祖特加獎諭曰。朕聞前朝皇帝嘗出郊畋獵。至夜方回。門官不納。從者曰。上在此。答曰。昏夜難以分辨。終不開。不得已從他門入。翌日厚賞守門者。今布恕庫出身行伍。從未知書。其所行竟與古合。朕彼時未曾細思。故坐以罪。宜賞賚以示鼓勵。於是

特賜內廐馬一匹。訓之曰。爾所行甚當。爲君上守門。理宜如此敬嚴。康熙九年。陞叅領。十三年。吳三桂反。以八旗都統副都統俱出征。其印悉令本旗叅領

署理。尋收其七。令大臣等兼管。以布恕庫公正無私。其印獨留。十六年。擢正黃旗蒙古副都統。晉議政大臣。

命往揚威大將軍和碩簡親王喇布軍前贊助。將行。引見於養心殿。

賜御膳。并刀一口。

聖祖仁皇帝特諭曰。簡親王年幼。未諳行兵之事。無論兵將。遇敵有不奮勇前驅者。爾卽以是刀先斬。後奏復。

賜弓矢等物。令侍衛桑格扶掖詣。

太皇太后宮請安。

太皇太后賜御膳一桌。銀三百兩。乳餅一囊。總管太監崔邦起傳。

旨曰。副都統年高之人。今於炎天出征。遇喉乾可啖此

乳餅。足以止渴。卽以是囊盛賊首歸。至十七年。擊敗

僞將軍韓大任。復分兵追殺至福建老虎洞等

處。大任等詣康親王軍前降。是年六月。率前鋒

兵。隨大軍拔道州全州。及新田東安湘陰諸縣。

進取永州府。敗賊於白水市。哲里橋蔡家店諸

處。遂下永州府。逆藩吳三桂遣兵圍永興。凡三



月我師攻之不克。逆黨胡國柱、馬寶等率兵三萬餘，侵晨來犯。布恕庫督兵隨大兵力戰。至三鼓，賊始敗潰。十九年，轉滿洲副都統，分調兵將赴廣西，拔興安、雒容諸縣。平柳州府，招降叛鎮馬雄之子馬成蔭，旋以積勞卒於軍。其喪至京城。

聖祖遣大臣及侍衛等迎奠。

賜塋地立碑，祭於墓，諡曰剛壯。族孫敦達禮，崇德三年從揚威大將軍貝勒岳託征明，圍定興縣，以第一人登城克之，授七分牛錄章京。世職六年。

太宗文皇帝征明，圍松山，敦達禮扈從。見敵中有介馬前驅者，射殺之，以功賞奴僕十二口。順治九年，兩遇

恩詔，加世職。爲拜他喇布勒哈番，兼一拖沙喇哈番。十一年，從征湖廣，廣東俱有功，加至三等阿達哈哈番。病卒。次子桑格，分襲父。拜他喇布勒哈番，加一拖沙喇哈番。康熙十四年，隨撫遠大將軍信郡王鄂扎征察哈爾布爾尼有功，加授三等阿達哈哈番。二十年，以前鋒叅領隨征南大將軍賴塔領兵進雲南，平定逆孽吳世璠，至石門。

坎安籠所黃草壩等處。連破賊二十二營。俱在行間有功。凱旋。以疾卒。

沙納哈巴圖魯。滿洲正黃旗人。姓賴卜氏。世居齊克潭和洛地方。順治六年。從征大同。叛鎮姜瓖。攻左衛。於紅衣礮擊破。缺城。奮勇先登。克之。賜巴圖魯號。授拜他喇布勒哈番。遇九年。

恩詔。加一拖沙喇哈番。十一年。從寧海大將軍固山額真宜爾德。征浙江舟山。僞英毅伯阮思等來拒戰。沙納哈同梅勒章京根特擊敗之。僞總制陳六御等。復率衆來敵。同梅勒章京柯永泰逆擊。

大敗之。十四年。論功。加授三等阿達哈哈番。緣事革去巴圖魯號。降爲拜他喇布勒哈番。康熙十三年。以叅領任夸蘭大。兼署右翼前鋒噶喇大。隨平寇將軍根特巴圖魯議政大臣護軍統領桑額。征逆藩耿精忠。由江西進剿。七月初六日。在撫州府鍾家嶺。破僞都督易天錫。九月初三日。隨定南將軍內大臣希爾根。攻克撫州府。併敗建昌府賊兵。初五日。率領前鋒。會同鑲紅旗夸蘭大希福納。正藍旗夸蘭大商吉圖。破撫州許灣賊三千餘人。十一月。追賊兵至界山地。

方敗之。十四年四月。隨定遠平寇大將軍安親王岳樂進攻建昌府。二十五日。至長興地方。距建昌府四十里。耿逆僞兵部尙書邵連登率領僞都督九人。賊兵八萬。立三十六營相距。沙納哈隨定南將軍希爾根等奮擊大破之。十五年二月。隨安親王岳樂至袁州府萍鄉縣。逆藩吳三桂遣僞將軍夏國相李良棟等領兵一萬三千來戰。沙納哈隨護軍統領桑額率前鋒四百名大破其衆。五月。至湖廣長沙府。吳逆賊兵自南門出城來犯。沙納哈仍同桑額等擊却之。十七年吳逆死。十八年正月。長沙賊兵棄城遁走。沙納哈撫定湘潭衡山等縣。是年。陞前鋒統領。十九年三月。隨定遠平寇大將軍貝子章泰進剿湖南。平定綏寧。會同乾陽三縣破僞將軍吳應麒等。克沅州。十月。隨貝子章泰進貴州。克鎮遠府。進攻貴陽府。僞將軍胡國柄吳應麒高起隆夏國相等。奉逆孽吳世璠遁往雲南。遂克貴陽府。二十年二月。追賊兵至江西坡。進取平彝衛及亦資孔等處。十九日。直抵雲南。是年加授軍前叅贊大臣。所至招降僞將弁等。十月二十

八日。由桂花寺進圍雲南省城。逆孽吳世璠自盡。餘黨悉降。雲南平定。凱旋回京。二十三年十一月。陞正黃旗都統。尋兼議政大臣。子穆爾泰。康熙十三年。以七品筆帖式。隨經畧莫洛。往征逆藩吳三桂。由陝西進四川。至寧羌州。值提督王輔臣叛。殺莫洛。穆爾泰隨衆與賊戰不勝。死之。二十二年。議卹。授拖沙喇哈番。以其弟倭舒襲。

費揚古。滿洲正黃旗人。姓納蘭氏。

孝敬皇后父也。初任三等侍衛。陞二等。兼管前鋒侍衛事。尋陞護軍叅領。加拜他喇布勒哈番世職。又調一等待衛。旋陞右翼步軍總尉。兼理內務府總管。康熙十七年。晉內大臣。管步軍統領事。又加一拖沙喇哈番。尋以病卒。雍正元年。以係

皇后父。追封一等公。

賜祭文云。宣力効忠。臣子殫奉公之義。策勲錫命。國家施念舊之仁。矧股肱懋禁近之庸。門閥炳椒房之貴。式崇恩禮。用錫褒綸。爾費揚古。奉職精勤。持躬恪慎。效趨承於禁闈。祇敬無渝。備宿衛於周廬。徼巡靡懈。克殫公忠之志。罔弛夙夜之勞。秀毓坤儀。祥鍾淑德。

八旗通志 卷一百五十二  
是用錫爾襲爵。賁爾佳城秩晉上公。指山河而申命。榮光幽壤。煥松柏以凝輝。嗚呼。念勲舊之家聲。名傳奕世。篤姍親之厚誼。澤逮重泉。式奠椒馨。庶其來格云。

達爾化。滿洲正黃旗人。姓賴卜氏。世居董鄂地方。任德州城守尉。康熙十三年。逆藩吳三桂反。達爾化從征。効力行間十年。得功牌甚多。授拜他喇布勒哈番。四十二年。陞江寧右翼副都統。覺羅德爾錦。滿洲正黃旗人。父曰覺羅國幹。

景祖翼皇帝第三兄五世孫也。以順治九年二次

恩詔授拜也喇布勒哈番世職。德爾錦於康熙十五年授七品官。隨旗上

朝。旋補三等待衛。以工騎射。選入托福和莽阿二

十年。陞二等待衛。任西爾們大。二十八年三月。任侍衛壯尼大。五月。陞一等待衛。三十二年。

補授駐防右衛護軍叅領。三十五年。隨撫遠大將軍伯費揚古征厄魯特噶爾丹。由西路進兵。

適夸蘭大布代患疾。遂委德爾錦署夸蘭大。至昭莫多地方。遇賊兵數萬。列陣逆戰。德爾錦隨

費揚古奮勇直前力戰。自未及酉。大敗賊衆。追

殺三十餘里。凱旋議敘。宗人府給第一等功牌一面。三十六年議敘。加一拖沙喇哈番。四十年。轉補火器營叅領。兼任察哈爾叅領。以詣知道路。又兼鄉導叅領。四十二年。緣事解叅領任。以世職隨旗行走。五十九年三月。起補副驍騎叅領。又兼佐領。十一月。陞鑲藍旗蒙古副都統。又轉正紅旗滿洲副都統。六十年正月初二日。奉聖祖仁皇帝特旨。召入乾清宮西煖閣。領所生十子。引見。命其長子內閣票簽中書蘇岱。照包衣筆帖式例。往浙江佐御史視鹽政。又許闔家常來請安。諸子中有二子未授室。

特命以內務府記名二秀女妻之。其未字之第三女。聖祖親爲擇配。適

孝誠仁皇后親弟之子。資粧俱令內務府備辦。一時歎羨。稱爲

殊恩焉。六十一年三月。陞正黃旗護軍統領。十月。陞正藍旗蒙古都統。雍正二年。解都統任。卒於家。

吳勒。滿洲正黃旗人。姓舒穆魯氏。世居庫爾噶郭羅渾春地方。康熙二十年二月。以委署護軍校。從征雲南逆孽吳世璠。隨征南大將軍賴塔。

奪石門坎黃草壩。平定雲南。并在事有功。授拖沙喇哈番。三十五年。從撫遠大將軍伯費揚古。征厄魯特噶爾丹。由西路進兵。破賊於昭莫多地方。加世職爲拜他喇布勒哈番。累官至鑲藍旗護軍統領。

查弼納。滿洲正黃旗人。姓完顏氏。世居鄂爾渾地方。叔祖名艾音布。崇德間任戶部理事官。以能稱職。順治四年考績。授世職拖沙喇哈番。七年。九年。三遇。

恩詔。加授三等阿達哈哈番。以疾卒。查弼納兄官音保襲職。官音保卒。查弼納始襲職。康熙二十八年。并襲佐領。四十四年。委署護軍叅領事。四十七年。改授吏部郎中。五十年。陞內閣侍讀學士。五十三年。又陞內閣學士兼禮部侍郎。五十五年。擢兵部侍郎。充

經筵講官。六十一年。陞兩江總督。雍正四年。調內務府總管。尋授鑲紅旗漢軍都統。兼議政大臣。未幾。又陞吏部尚書。仍兼內務府總管。協理兵部尚書事務。明年。改授兵部尚書。七年。

世宗憲皇帝命吏部尚書內大臣公富爾丹爲靖邊大

八旗通志 卷一百五十一  
將軍由北路進討準噶爾。查弼納叅贊軍務。明年卽軍前授爲副將軍。九年與賊兵遇於和通胡爾漢諾爾地方。查弼納力戰歿於陣。長子那興阿承襲世職。拖沙喇哈番。緣事革職。弟那清阿復襲世職。拖沙喇哈番。尋議查弼納功。追授爲拜他喇布勒哈番。又一拖沙喇哈番。併加那清阿爲三等阿達哈哈番。世襲罔替。

定壽滿洲正黃旗人。姓何舍里氏。世居薩哈連烏喇之哈達村。祖祁郎阿崇德。八年從貝勒阿巴泰征明。攻山東萊蕪縣城。克之。授世職半個。

前程。順治七年九年三遇。

恩詔。加至三等阿達哈哈番。康熙九年卒。子殷達蘭襲卽定壽父也。殷達蘭卒。定壽始襲職。定壽有材勇。初選三等侍衛。尋陞護軍叅領。又擢副都統。未幾陞前鋒統領。又晉都統。康熙五十八年以副將軍出征準噶爾。至阿爾泰地方破賊有功。雍正二年。

特恩追敘。授拜他喇布勒哈番。并原襲世職爲一等阿達哈哈番。仍改授前鋒統領。七年領前鋒兵。靖邊大將軍公富爾丹由北路進剿準噶爾。九



入旗通志 卷一百五十一  
年。至和通胡爾漢諾爾地方。與賊遇。定壽勇氣百倍。率前鋒兵奮勇衝殺。所向披靡。後賊勢愈熾。定壽竟力戰歿於陣。尋議卹。加授世職。爲三等阿思哈尼哈番。以其子和義承襲。

永國。滿洲正黃旗人。姓巴岳特氏。世居阿蒲凱地方。由官學生考授內務府筆帖式。康熙六十年。調理藩院筆帖式。雍正元年。遷本院主事。尋陞員外郎。明年。擢本院郎中。五年。陞內閣侍讀學士。七年。陞

盛京禮部侍郎。未之任。

世宗憲皇帝詔以吏部尙書內大臣公富爾丹爲靖邊大將軍。統兵由北路進剿準噶爾。永國以內閣學士銜隨護大將軍印務。九年。與賊遇於和通胡爾漢諾爾地方。我兵轉戰連日。永國亦併力戰陣亡。尋議卹。授世職。拜他喇布勒哈番。穆占。滿洲正黃旗人。阿思哈尼哈番德爾格勒孫也。初任旗員。順治十七年。陞正黃旗滿洲副都統。康熙十二年。署前鋒統領事。十二月。逆藩吳三桂以雲南反。四川巡撫提督總兵等官悉叛降於賊。

聖祖仁皇帝以都統赫業爲安西將軍。由漢中入川。穆占奉

命統兵同往。十三年三月。同西安將軍瓦爾喀率官兵擊吳逆僞總兵葉某。自野狐嶺直抵陽平關。擒斬賊衆三千餘。遂復陽平關。五月。同將軍赫業領兵自漢中府起程。抵七盤關。穆占前驅。大破賊衆於關口。又敗之於鍾子舖。十四年三月。同定西大將軍貝勒董額統兵至鳳翔府之隴州。遇僞總兵高鼐率賊四千在關山河岸拒守。遂整陣前進。大敗賊兵。乘勝追北。恢復關山關等

處尋

聖祖命爲安西將軍。七月疏報。臣奉定西大將軍貝勒董額令。赴援鞏昌。卽同總兵官孫思克。於六月二十一日抵鞏昌。遣投誠官陳萬策謝輝等入城曉諭。僞總兵陳科等率衆出降。計馬步兵四千九百餘名。民兵五千六百餘人。安插居民十三萬五千有奇。恢復郡城。十五年六月。進兵至樂門。賊聞風遁去。追剿至紅崖等處破之。恢復禮縣。慶陽府僞總兵周揚名。王好問。僞副將孔蔭熊等。共率所屬文武僞官九百餘員。兵丁四

萬八千二百名有奇。陸續投誠。秦中平定。是月奉

命改授征南將軍。

聖祖諭曰。將軍穆占。速赴湖廣。簡選荆岳夔陵士馬。由岳州趨長沙。接應安親王兵。若長沙軍無虞。或出夔陵。或取岳州。或由荊州渡江。便宜進發。十六年正月。疏奏。臣等率兵由岳州赴長沙。深入賊地。岳州百里界內。宜發兵防守。庶無斷後之虞。

聖祖以所餘兵單。不允所請。又疏奏。臣抵岳州。相度形勢。江湖之間。非船不濟。今安徽巡撫造送沙船四十艘。於本月十五日到岳。應再發江南荊州諸處沙船百餘艘。齊赴岳州軍前。倘長沙未能卽克。至三四月間。臣等遣兵取船。由洞庭前進。或攻或圍。均有攸賴。若長沙旣得。則安親王及臣等之兵。卽乘此船。水陸夾攻岳州。庶乎有濟。奏入。

聖祖命京口將軍王之鼎。發沙唬船六十艘。隨帶礮械水手人役。量配官兵。護送岳州。并靳輔所送船。足百艘之數。以備安親王岳樂將軍穆占取用。七月。以安親王岳樂疏奏。兩軍同駐日久。糧芻益艱。

聖祖特諭將軍穆占。卽統兵到岳州。亦必俟鳥船告竣。然後進攻。度鳥船到彼。正當隆冬水涸以前。若俟來年水長。進兵勢必坐守岳州。虛糜日月。穆占宜勿赴岳州。以兵會簡親王。規取衡永諸處。遏賊後路。如此則粵東得以寬緩。而粵西欲降者。亦可乘間來歸。穆占等。卽率岳州官兵。速赴茶陵攸縣。與簡親王協力。進取衡永諸處。八月。吳逆侵犯廣東廣西等處。

聖祖諭曰。逆賊侵犯韶州桂林諸處。皆由大將軍安親王岳樂將軍穆占等。擁兵坐守長沙。不卽破賊平定。湖南所致。岳樂等。其以文到日。卽分兵令穆占率赴樂昌諸處。以斷來犯韶州賊兵後路。夾而攻之。度未可行。穆占卽會同大將軍簡親王喇布。進取衡永諸處。以斷侵犯兩粵賊兵後路。尋又奉

諭旨。將軍穆占。自岳州帶往兵。令分每佐領四名。留駐長沙。聽安親王酌量遣發。赴醴陵防守。九月。穆占奏言。臣等於本月初二日。赴袁州。察訪進兵道路。卽赴樂昌。如有未便。則會合簡親王。進取衡永。又前議留兵。每佐領四名。於安親王所。適兵部咨。以文到日。卽分兵赴樂昌。用是悉師以往。未獲分留長沙。

聖祖諭曰。穆占不進取樂昌。又不赴茶陵攸縣。徑回袁州。以會同簡親王爲辭。又自違本議。將荆岳所帶官兵。盡携赴袁州。不分留長沙。殊屬不合。穆占其速如前議。分每佐領兵四名。留安親王軍前。其或進取樂昌。或由茶陵攸縣進取衡永。作速定議。一面前進。一面奏聞。尋穆占疏言。臣在袁州養馬二十五日。卽赴樂昌。因此不留兵長沙。悉以大兵隨行。復奉

諭旨。將軍穆占仍遵前旨。速分兵每佐領四名。赴安親王軍前。穆占又奏。臣遵部檄。分每佐領兵四名。付副都統公圖。於本月初十日。赴安親王軍前。因部

檄不言留綠旗兵與紅衣礮。故臣盡率綠旗兵。攜紅衣礮至袁州。得

旨。穆占如期養馬畢。卽速行剿賊。其所率綠旗官兵。皆

係秦楚勞瘁將士。官員各加一級。兵丁支正項賞賚。

十一月。揚威大將軍簡親王喇布。以賊首韓大任欲渡河潛遁。難以擊滅。奏請令穆占分兵堵禦。穆占疏言。聞吳三桂遣僞帥三人。由永新犯吉安。臣身在地方。洞悉情形。僞帥來犯。非迎擊不可。臣是以率兵前進。於本月初三日。已抵永新。俟後軍一至。卽剿除永新百里外所屯賊寇。

進取茶陵。其逆賊韓大任。應令大將軍簡親王。或和碩額駙華善。率兵堵禦。尋奉

聖祖諭。簡親王速調副都統布恕庫。提督趙賴等所轄之兵。亟滅韓逆。將軍穆占。身臨賊境。必悉情形。或先赴梁口。協剿逸寇。或已進取茶陵。遏禦楚賊。卽乘機平定湖南。其詳悉籌度。無失事機。十二月。穆占疏報。十一月至茶陵州。知賊衆已遁。卽令都統宜理布等。領兵追剿。賊衆奔入攸縣。據河岸迎敵。我兵奮勇前進。奪取城門。陣斬賊兵四千餘級。生擒一百餘名。餘賊遁去。茶陵攸縣。俱已恢復。尋

又奏茶陵攸縣。新經恢復。乞調副都統公圖。率往長沙之兵。及袁州總兵官趙應奎。兵來此戍守。臣卽赴梁口。剿賊得

旨。會剿大兵爲數已多。簡親王等。其併力殺賊。務在殄滅。穆占當以恢復茶陵攸縣事。啓聞安親王。而親統大兵。底定湖南。已而穆占又疏言。逆賊吳三桂。堅守衡州。衡州茶陵相距甚近。水陸兼通。臣所部兵。戰守未足。乞調安慶提督王永譽。率標下官兵。前來併力圖賊。

聖祖諭曰。前以徽州要地。遣王永譽率兵駐守。不便隔

省調遣。安親王軍前益以副都統公圖之兵。爲數頗衆。今將軍穆占已復茶陵攸縣。將進兵湖南。安親王其速遣提督趙國祚盡率所部兵。復量加滿兵。往守茶陵攸縣。俾無誤穆占進剿。安親王穆占更宜互爲聲援。同心協謀。以期破賊。是月穆占又疏報。安仁縣所屬高石地方。有僞韶南將軍及監軍道駐扎。又茶陵州所屬石井地方。有僞知縣駐扎。卽遣官兵前往。生擒逆賊譚文度。僞知縣譚敦錫。獲僞韶南將軍及僞監軍道關防。十七年正月。穆占疏言。聞逆賊自失茶陵攸縣諸處。饋餉不給。軍士胥怨。民多遠避。但茶陵等地方新復。亟須堅守。臣惟俟安親王所遣滿兵。及提臣趙國祚抵茶陵日。并韶州滿兵。平南王下綠旗兵。何時由樂昌進取宜郴等處。知會到時。方可相機前發。進取湖南。若逆賊韓大任等逸入楚境。江西大兵宜追躡至湖南。庶賊可撲滅。新復地方亦得無虞。得

旨。前命平南王尙之信率兵赴韶州。會將軍額楚等由樂昌進宜章郴永。其進兵可否。尙之信等尙未奏知。穆占所領陝西荆岳諸處將士。皆經簡擇。平定湖南。

唯此精兵是賴。當茲逆賊窮蹙之時。卽宜速定湖南。殄滅凶醜。不可待尙之信等兵。坐失機會。至江西大兵。現在征討韓大任。平賊之後。自有措置。豈可懸揣卽行指示。穆占亦不必待江西兵至湖南。卽鼓行滅賊。亟靖疆場。安親王亦宜速遣提督趙國祚赴茶陵。其逆賊地方失守。軍怨民遁情形。可移會荆岳長沙大將軍王貝勒等知之。尋報。臣遣發官兵。大敗賊衆於鄱縣。斬獲僞總兵副將等十餘員。又報。臣遣發官兵。屢敗賊衆於富茂灘地方。擒斬無算。恢復永寧縣城。二月。穆占疏言。茶陵攸縣安仁永

興鄱縣幅幘遼濶。與賊逼近。臣等雖擊敗賊首郭應輔等。而餘賊大半仍匿鄱縣山谷中。且吳三桂盤踞衡州。江之東岸。有僞將軍馬寶等立營。獨令倭赫控制諸地。兵力殊單。得

旨。穆占著俟簡親王至湖南日。會同定議。三月。穆占疏言。大將軍簡親王所遣護軍統領哈克山之兵。來自長途。馬多疲乏。臣若俟之同行。將至炎暑。今當於署副都統公倭赫。總兵官趙應奎至日。委以地方。卽行前進。但茶陵諸處曠濶。兵力未敷。請先調江西兵內馬肥者。每佐領二三人。遣



大臣一員率之速赴茶陵鎮守。簡親王兵必由茶陵進發。臣等移兵候於來陽郴州。協謀以行。得

旨。茶陵諸處所屬亦屬重要。理宜固守。授和碩額駙華善定南將軍印。同學士薩海領之。速赴茶陵。與倭赫等協同駐鎮。哈克山等至吉安。稍休士馬。卽繼簡親王進兵湖南。共圖滅賊。尋穆占又奏。請令簡親王兵與其所部兵會合一路。自茶陵取郴州耒陽諸處。卽自永州渡江。直向衡州。

聖祖諭簡親王整頓軍馬。速與穆占會合。詳加籌畫。令江西萬無他虞。保固茶陵諸處。及大將軍安親王後路。然後會師一路進發。平定湖南。閏三月穆占疏言。接大將軍安親王檄稱。湘潭偽將軍林興珠遣人約降。大兵方渡江。駐湘潭。以圖進取。臣若俟簡親王至日方行。恐失機會。今議以南昌所屬。付總督董衛國。贛州南安。付將軍舒恕。令之駐守。留每佐領兵二人於吉安。令副都統一人領之。防守泰和萬安諸處。又留滿兵三百人於永新。亦令副都統一人領之。勦禦郭應輔等賊。兼顧茶陵後路。又令袁州副都統席布率每佐領

八旗通志 卷一百五十一  
兵二人。鎮守袁瑞臨江諸郡。兼顧安親王後路。廣信尚有餘賊。令總兵官許貞領標兵二千駐守。其總兵官高登科標兵一千。贛州綠旗兵二千。俱聽簡親王統率前進。簡親王抵茶陵日。留所部才能大臣精銳官兵之半。其餘簡親王率之。仍遵前。

旨從臣兵所行之路。進定湖南。至攸縣最爲要地。臣已留前鋒統領希佛率署副都統公倭赫之兵。與將軍華善協同鎮守攸縣安仁諸處。兼顧江西。於本月十二日自茶陵啓行。進取耒陽郴州桂

### 東桂陽得

旨。將軍舒恕現鎮南韶諸處。不便更令移駐南贛。其令巡撫佟國楨總兵官哲爾肯駐守。餘如所請。當此逆賊震動之際。穆占急宜進兵郴州耒陽。以分賊勢。耒陽諸處克復。卽於上游渡江。斷賊歸路。與安親王協力。勦寇如江未可渡。則作渡江之勢。畧定沿江北岸地方。以張安親王大軍聲勢。尋穆占又報。江西長寧縣僞昭陽將軍下總兵謝聘等三十二員。率領兵丁投誠。六月穆占又報。萬巖山內賊首僞總兵何興等六員。副將等三百餘員。兵丁二萬餘。

名。俱各投誠。尋疏奏。郴州等九州縣。幅幘遼濶。設有賊出犯。無兵可遣。因檄駐守廣東南雄將軍舒恕。分兵赴郴州。今逆賊逼永興。宜調江西提督趙賴。往守攸縣。昇和碩額駙華善將軍印。卽率署前鋒統領薩克察巴圖魯滿兵。總兵官趙應奎標兵。由安仁進發。斷耒陽賊後路。毀其浮橋。如不可毀。則遣赴永興。與副都統雅秦。雅哈喇。額思赫等。協同固守。臣盡撤所部還郴州。整兵前取耒陽。則逆賊自潰。得

旨。將軍穆占統率大兵。由秦入楚。自荊州啓行以來。凡兵將或攜或留。及調遣守禦事宜。無不如奏。允行。卽今破賊收疆。亦皆穆占是賴。此等調度。俱如所請。行。九月。穆占疏報。官兵敗賊於耒陽縣地方。擒僞守備胡起龍等。尋穆占又奏言。因華善等至郴州。永興賊遁。故臣未赴永興。遣副都統保住。總兵官趙應奎。署副都統雅秦等。各以所部兵從華善往守。撤臣所部前鋒護軍甲兵。及漢軍綠旗兵。盡還郴州。休息軍馬。以候

諭旨。已而揚威大將軍和碩簡親王喇布疏言。臣上三旗內府佐領兵三百人。未發永興。因檄詢華善

等。華善等言此兵至郴州。皆願軍前効力。穆占遂留之。以臣所遣之兵。華善不啓臣知。竟留穆占軍前。穆占亦不以留兵之事聞之於臣。倘遇驚急。有所調發。亦皆如此。恐悞軍事。嗣後華善之兵。或聽穆占調遣。或聽臣調遣。伏候

睿裁。

聖祖諭。簡親王方勦撫逆寇之際。穆占盡撤其屬兵。茶陵攸縣安仁諸處。所存兵每佐領不足七人。大將軍安親王每佐領兵二人。復遣還長沙。致簡親王兵力單弱。遇有調遣。穆占又相去甚遠。誠難應時。卽至今

簡親王赴安仁。相機進剿。其所部兵。當聽隨宜調遣。簡親王所發官兵。穆占并未商酌。任意留之。不合。其內府佐領兵三百人。仍令發回。至永興地方。本令穆占簡親王協同守鎮。今若止令簡親王駐守。倘簡親王相機進發。或逆賊來犯。恐兵力單弱。關係匪輕。其令穆占簡親王協議。各酌遣官兵。共守永興。今逆賊吳三桂已死。正急宜勦撫之會。穆占簡親王其凜遵諭旨。同心合力。以圖濟事。已而簡親王復奏。華善多諾俱已降黜。永興現缺統帥。因授內大臣阿密達揚威將軍印。以夸蘭大碩塔阿晉泰等副之。

遣往駐鎮得

旨。簡親王既赴安仁。叅贊不可無人。阿密達仍與簡親王偕往。永興去郴州不遠。况穆占前奏郴州別付一大臣鎮守。以便親赴永興。宜令穆占或選彼處所有大臣一員。往鎮永興。或親往鎮守。酌可而行。十八年三月。穆占疏報。臣等遣人賫

勅前往新田寧遠道州諸處招撫。有偽總兵李魁等文武官七十餘員。率領兵丁家口投誠。尋又奏。臣等率領官兵追擊常寧縣賊。偽總兵郭應輔等迎敵。我兵奮勇前進。陣斬八百餘級。餘賊悉遁。

恢復縣城。尋又報。賊渠吳國貴等遁往永州爲守城計。臣遣官兵追及之。於白水市諸處擊敗賊衆。斬殺甚多。是月初九日。遂復永州。於是道州永明江華東安等縣所有之賊。聞風俱棄城而遁。四月。穆占疏言。臣自辰州啓行。追賊二十日。會大雨泥濘。馬斃甚多。兵士乏騎。得

旨。穆占與大將軍簡親王進發廣西。宜速撥武昌馬千匹。送至穆占軍前。以給乏馬兵士。尋又報。臣遣右營遊擊張德恩等領兵恢復灌陽縣。都督僉事陳輔弼等領兵恢復興安縣。又遣投誠偽總兵陳

邦賢領兵恢復全州。五月疏報。下總陳有聲等領兵進取恭城縣。僞知縣張魁臣以城降。七月。穆占招撫僞總兵路奇遇等文武各官一百七十九員。八月。克復新寧縣。十一月。

聖祖特命貝子章泰爲定遠平寇大將軍。與穆占同心商酌而行。十九年四月。穆占會同總督董衛國率官兵進取沅州。擊敗僞將軍吳應麒等。恢復沅州。十月。自平溪衛與貝子章泰及綏遠將軍總督蔡毓榮等領兵前進。於十月十一日抵鎮遠府。逆賊僞將軍張足法楊應選等夜遁。恢復府城。

穆占復追剿逸賊。復偏橋衛與隆衛。二十年二月。疏報僞大將軍高起隆僞將軍夏國相王會王永清張足法楊應選儂朋等擁衆二萬餘人。屯踞平遠西南山上。臣與提督趙賴率滿漢官兵。於正月二十二日進擊。連敗之。高起隆等俱遁走。王會率其標下弁兵詣軍前降。遂復平遠府。三月疏報。二月初八日。臣遣副都統莽依圖遊擊王成功等領兵四千追剿逸賊。僞將軍張足法等拒敵。我兵連奪三山。賊敗走高家橋。再戰。又奪其橋。陣斬千餘人。墜崖死者無算。擒獲

甚多。尋又報。二月十八日。收復黔西州大定府城。擒僞巡撫張維堅等斬之。水西土司安勝祖等効順助餉。又率其屬阿五等協力剿賊。四月疏報。僞將軍楊應選等率領所屬弁兵投誠。尋又奏。平遠大定黔西遵義悉經恢復。諸處向有賊將。俱奔赴雲南矣。貴州無警。臣同副都統華色宜思孝遵大將軍貝子等檄率護軍驍騎漢軍兵每佐領四人進征雲南。餘兵付前鋒統領薩克察巴圖魯總督董衛國等留鎮貴州。

聖祖諭曰。賊雖奔散。黔省有土司苗蠻雜處。關係匪輕。將軍穆占酌量率兵。仍回貴州。統攝官兵固守疆土。副都統華色宜思孝。旣已前赴雲南。薩克察巴圖魯不必赴雲南。是年貝子章泰都統賴塔等。各處兵進雲南。平定吳逆。穆占俱在行間有功。明年十月還京。二十二年三月。議政王大臣等議。穆占行間情罪。擬卽行處絞。籍沒家產。奏入。

聖祖諭曰。穆占在保寧。謊稱糧米已經運到。在秦州交戰時。不臨陣指揮。遠立觀望。在辰州。推諉不救。永興以此坐罪。固宜。但伊勞績約有二百六十處。他人勞績四五十處。尙行抵罪。伊有如許勞績。獨不可相抵。

乎。這所議稍過。著再議。尋議覆穆占應革去都統阿  
達哈哈番。籍沒家產。妻及未分家子。交內務府。  
得

旨著革職。餘俱從寬免。後以疾卒於家。

八旗通志初集卷之一百五十二

名臣列傳十二

正白旗滿洲世職大臣一

達爾漢轄

薩木什喀

羅什

雅賴

準塔巴圖魯

弟胡什布  
薩里

丹布

丹布子拉

康果禮額駙

子麥色  
孫杭齊

喀克篤禮

兄昂武  
武子馬克圖

賴塔

朱瑪喇

弟伊瑪喇



達爾漢轄。本名扈爾漢。滿洲正白旗人。姓佟佳氏。其父扈喇虎。於

太祖高皇帝戊子年。由雅爾古地方。率十子及所屬人民來歸。以其人編立牛录使之統焉。扈爾漢係扈喇虎長子。

太祖優遇之。養以爲子。賜姓覺羅。授一等大臣。及爾喀部蜚悠城長。名策穆特黑者。苦烏喇貝勒布占泰之虐。請移家內附。

太祖命扈爾漢隨舒爾哈齊貝勒往遷之。扈爾漢以兵三百護五百戶先行。烏喇聞之。遣萬人邀諸路。

扈爾漢卽結寨山巔。分百人衛之。身率二百人拒敵。使人馳告。後隊衆貝勒。是夕。以二百人與烏喇萬人相拒。敵不能犯。次日敵衆來戰。遂同楊古利額駙迎擊。却之。洎洪巴圖魯貝勒代善貝勒兵至。乃大破其衆。丁未年。從卓禮克圖貝勒等。征東海兀集部。取赫席黑。俄漠惠蘇魯。佛納赫。拖克索。三路。俘獲二千人。已酉年冬。率兵一千。征東海兀集部所屬滄野路。悉降所部。收二千戶以歸。

太祖嘉之。賜以甲冑乘馬。又賜達爾漢轄號。辛亥年冬。往征兀集部。虎爾哈路。同何和理額駙等。圍扎庫達城。三日不下。遂攻之。斬首千餘。俘二千人。其環近各路。盡招撫之。令土勒伸額勒伸二人。衛其民五百戶而歸。天命元年。秋七月。同順科洛巴圖魯統兵二千。征東海薩哈連部。至兀爾簡河。刳舟二百。水陸并進。取河南北三十六寨。復擬渡江進取。移師駐黑龍江岸。先是江水常以九月始冰。時八月初旬。忽冰結如橋。衆皆驚喜。以爲天助。遂聯騎徑渡。渡畢冰解。因取江北十一寨。師還。冰結如前。又招降使犬路及諾洛

八旗通志 卷一百五十三  
路石拉忻路部長四十人。四年明兵四路來侵。  
達爾漢轄從。

太祖擊明撫順。開原。二路兵。大敗之。復先率千人。禦董  
鄂路兵。摧其前鋒。伏兵山隘以扼其衝。

太宗皇帝是時號四貝勒。與諸貝勒繼至。併力奮戰。大  
破明劉綎兵。盡殪之。又與代善貝勒破明遊擊  
喬一琦兵。擒一琦。達爾漢轄荷。

太祖撫育之恩。奮不顧身。每遇戰陣。輒爲前鋒。茂建勲  
績。英年加秩至一等大臣。居五大臣之列。輔翼  
鴻業。歷加世職至三等總兵官。八年卒。時年四十有

八。

太祖親臨其喪。哭之。以二等總兵官世職。令其第三子  
渾塔襲之。緣事罷退。

世祖章皇帝追念其勲。復賜精奇尼哈番世職。令其五  
子分襲。康熙三十七年。

聖祖仁皇帝謁

祖陵至盛京。特遣大臣往奠墓次。子八人。長阿爾賽。次  
布爾賽。第五子胡什布。第七子達賴。第八子丹  
布。并以父軍功。各分襲一拜他喇布勒哈番。第  
四子準塔巴圖魯。最知名。自有傳。渾塔子色勒。

八旗通志 卷一百五十二  
曾任散秩大臣。

薩木什喀達爾漢轄第三弟也。早從征伐。所至有功。歷授遊擊世職。征董夔時。薩木什喀僅率十二人。追敵至山下。殺其拜思噶爾轄扎穆吳巴什等百餘人。獲火礮五十三。俘獲人口馬牛羊千計。天聰四年。征明。攻灤州。薩木什喀攜箭七百枝。以四百枝與那木泰。圖爾格。散給衆兵射之。因而勝敵。七年。從德格類。岳託。二貝勒。往征明旅順口。由陸地運船於水。衆皆乘馬。薩木什喀乃聚衆議曰。我兵旣欲潛進。何乘馬爲。于是衆皆步行。時鑲紅旗鑲藍旗鑲黃旗俱無船隻。不能前進。薩木什喀獨率衆運船。比臨水次。管兵部事岳託。貝勒謂之曰。薩木什喀。汝可努力。答曰。貝勒。但以此城必得爲念。我豈肯乘船而返哉。遂同霸奇蘭乘船。先八旗而進。敵人拒戰。身被一創。戰益厲。遂擊敗馬步敵兵。我師大隊繼進。遂破旅順口。先是薩木什喀以事削。擊世職。至是爲步兵翼帥。不違貝勒指示。整兵破敵有功。遂復授世職爲一等叅將。八月師旋。

太宗文皇帝率諸貝勒大臣。迎旅順口。凱旋德格類。岳

託兩貝勒於十里外。立燹拜

天。行禮畢。

太宗命英俄爾岱傳諭。問凱旋之貝勒及大臣安否。薩木什喀進前對曰。蒙

天庇佑。遵

聖訓。指授方畧。已攻肅旅順口城。於是設大宴。

太宗親以金卮酌酒。賜兩貝勒。次賜步兵帥霸奇蘭及薩木什喀。八年任甲喇章京。十二月奉

命同管白奇超哈梅勒章京。副霸奇蘭。率章京四十一員。兵二千五百名。往征黑龍江地方。臨行。

太宗諭令撫慰俘獲之人。言此地人民語音。與我國同。攜之而來。可以爲我國用。攻畧時。當語之曰。我本是一國之人。爾以不知載籍之故。竟至於此爾。

諭畢。賜食。又

諭曰。畧地之後。或報捷。或遣兵送俘。必令由科爾沁國。舅吳克善所屬之席北綽爾門地方。其應畧之地。有夏姓武因屯。長喀拜。庫魯木圖屯。長郭爾敦。及納屯等。各遣從役輸誠。今令其人從軍。爲鄉導。爾等畧定他屯。不可犯此。歸附三屯。宜仍留於本處。若他屯未定。此三屯當盡行攜來。

諭畢。命薩哈廉貝勒等大臣送至二里外。九年四月。與  
霸奇蘭遣白奇及兵部啟心郎額色黑伊木布  
齎捷音至。言收服編戶壯丁二千四百八十有  
三。人口七千三百有二。牲畜馬八百五十六。牛  
五百四十三。又俘獲婦人子女一百十六。馬二  
十四。牛十七。犬四十三。貂皮一千一百二十四。  
及狼皮。狍狸。獾皮。水獺皮。狐皮等。又騷鼠皮裘  
十二領。騷鼠皮一百六十張。青鼠皮裘三領。青  
鼠皮一千五百六十張。五月。敘出征諸臣功。以  
薩木什喀征黑龍江。盡克其地。所獲人民。全編  
氓戶。攜之以歸。尋以出師有功。由三等甲喇章  
京世職。加爲三等梅勒章京。又加世襲。一次。共  
襲十二次。丙辰。與霸奇蘭獻俘獲人口一百一  
十六名。馬二十四匹。牛十七頭。貂。狐。狍。狸。獾。水  
獺。青鼠。黃鼠等皮三千一百五十張。皮裘十五  
領。

太宗以出征大臣勞苦。分賜右翼五固山兵主霸奇蘭  
左翼五固山兵主薩木什喀。以下章京四十四  
員。各賞賜有差。其薩木什喀。霸奇蘭。招降七千  
三百人。俱

賜房屋田地衣食器皿等物。薩木什喀遷白奇超哈固山額真。崇德三年三月，隨武英郡王阿濟格助攻皮島。四月初八日夜，武英郡王遣八旗甲喇章京率擺牙喇兵進攻。以薩木什喀督之前進。續遣白奇超哈乘小船繼之。又遣阿禮哈超哈四邊城章京全軍及烏真超哈三順王兵。朝鮮兵乘艦而進。以兵部承政車爾格統領進攻。薩木什喀統前鋒擺牙喇十船渡江。首先抵岸。遣人語鰲拜準塔駐兵以待。既我師齊列，挨牌敵於堡上列陣拒戰。薩木什喀奮勇力攻，克之。取其島。七月敘功。由二等梅勒章京世職，優加爲二等昂邦章京。世襲罔替。是月陞任工部承政。十一月奉

命同曹海往征索倫部落黑龍江。五年三月，遣党習郭查等齎奏至。言臣等前奏獲二千二百五十四人。後自額蘇里屯以西，額爾庫屯以東，又獲九百人。共獲男子三千一百五十四人，婦女二千七百一十三口，幼小一千八十九口，共六千九百五十六名口。馬四百二十四匹，牛七百四頭。又先獲貂皮一千八百一十張，狐皮三十四張。

狼皮十張。水獺皮九張。貂裘一領。狝狸獾裘一領。狐裘七領。貂皮二千二十八張。狝狸獾皮八張。青鼠皮一千六百四十二張。旋緣事革退世職。崇德七年。從大兵征明。攻錦州。敵兵來犯我寨柵。鋒勢甚銳。薩木什喀力戰。三敗其衆。錦州既克。敘功。復授牛彙章京世職。

羅什薩木什喀之子也。任王府長史。天聰七年。從征大同。遇敵兵四百餘人。擊敗之。射死七人。得馬七匹。九年。征明。率兵四十人前行。敗祖總兵兵一千餘人。又同胡洒率左翼兵前進。擊敗

敵兵。崇德元年。從征朝鮮。朝鮮王京城兵迎戰。羅什奮勇前進。殺敵副將一員。進兵圍南漢城。以步戰破敵。又奉差從朝鮮回盛京。有自塔山來明兵三百人截戰。羅什同蘇爾得等敗之。又敵兵三千餘衆。降而復變。仍擊敗之。三年。隨睿親王多爾袞征明。遇明馮太監領兵來戰。羅什隨蘇拜前擊敗之。五年。圍錦州。攻杏山。明錦州兵與我左翼兵相戰。羅什協力擊敗敵兵。又同八章京率每牛彙護軍一名。敗錦州兵。復敗松山敵衆。明軍門洪承疇率兵來援。隨大兵敗之。



殺三十餘人得馬十六匹。敵兵自城內衝出亦擊敗之。仍追殺四百餘人。獲馬二百餘匹。是夜明馬兵從松山突出來戰。羅什隨大兵追至海沿擊殲之。又敗杏山敵兵。追至塔山。殺步兵一千餘人。英親王阿濟格屯兵杏山河。有明寧遠兵千餘來哨探我營。羅什同前鋒八章京追殺之。敵兵來驅我馬羣。羅什追奪斬敵甚衆。仍生擒其哨探而回。八年。征明至鎮寧口。同胡里布率四十人前進遇敵。時噶喇昂邦努三蘇拜隨後策應。大敗敵兵。順治元年。隨睿王多爾袞。在山海關破流賊。敗唐總兵。又追流賊至安肅慶都等縣。大敗之。俱在事有功。優授爲一等甲喇章京世職。順治七年遇

恩詔。加至三等阿思哈尼哈番。

雅賴。達爾漢轄第十弟也。早年從征烏喇。卽著勞績。以被創賞人三口。畧地朝鮮。與姜總兵戰。又被一創。與他將合賞馬一匹。天命六年。隨大兵征明。克遼東。同戴木布。楞額禮。于達岱塔地方。擊蒙古兵。先登破之。賞馬一匹。牛一頭。又從征察哈爾。率兵登山寨。殺敵。大有俘獲。招降甚

衆。天聰二年征明。攻廣寧。明巡撫袁崇煥兵圍我擺牙喇兵。會城中敵兵亦出。雅賴隨主帥伊爾登力戰。伊爾登壯之。以告于本旗二貝勒。由是知名。三年五月。同羅璧折爾德清善率步兵一千。往畧明新城一帶。遇毛文龍採參船四隻。殺六十人。毀其船。九月癸未。同楊古利額駙。阿山楞額禮。率馬兵一百。步兵二百。往雅爾古地方躡緝逃人。遇毛文龍採參者。殺九十六人。生擒千總三員。及其從人十六名。以歸。五年。大兵征明大凌河。正白旗士卒有亡於敵陣者。欲取其屍。敵陣堅。衆不能進。雅賴單騎直入。殺三人。曳其屍而還。有敵兵自大凌河城隅而出。雅賴率擺牙喇兵整隊攻入。七年六月。再征明旅順口。雅賴與薩木什喀同舟而進。未及登岸。船內中傷者十七人。死者一人。比及岸。雅賴越薩木什喀而前。先登。殺敗敵兵。又向陸路。馬步兵大呼曰。雅賴先入矣。遂衝入敵隊。比天明。與敵兵戰於城門。我兵有退怯者。雅賴取岳託貝勒部下所收大凌河蒙古之刀手刃之。驅衆擊敗敵兵。雅賴雖係擺牙喇額真。原無世職。以是役徹

初集

夜督戰。身被一創。與薩木什喀併力破敵有功。始授備禦世職。崇德六年。七年。大兵征明錦州。松山。八年。貝勒阿巴泰。征明北京山東等處。雅賴俱在行間有功。議敘。加半個前程。順治元年。四月。從睿王多爾袞破流賊。定燕京。二年正月。敘功。加授世職。為三等梅勒章京。是年。從豫親王多鐸南征。破流賊。及平定河南江南。又加半個前程。七年。九年。遇

恩詔。加至一等阿思哈尼哈番。兼一拖沙喇哈番。康熙三年。病故。子花色襲。

準塔巴圖魯。達爾漢。轄第四子也。天聰八年。因辦事有能。不違指使。授牛录章京世職。崇德二年。貝子碩託等。往征明皮島。守將沈總兵。堅守不能克。三年三月。準塔隨武英郡王阿濟格。統兵往助攻。王集諸將。詢問進攻之策。準塔與鰲拜。向王前約曰。我二人奮勇先登。必能克之。我等若不得此島。必不復來見王。遂與鰲拜。連舟渡海。先眾而往。舉火為號。以待後師。敵兵於堡上列陣拒戰。準塔與鰲拜。冒矢石直衝敵眾。遂克取其島。是年議敘。以此島可比大城。由牛录

章京世職。超擢爲三等梅勒章京。

賜名巴圖魯。加襲六次。歷陞至固山額真。七年七月。奉命同輔國公博和託。吞齊哈扎哈納。固山額真葉臣。何洛會。巴特瑪等。率官軍往代饒餘貝勒阿巴泰等。戍守錦州。尋以代旋師。八年十二月。復奉

命同固山額真譚泰。統領官兵。更番駐防錦州。順治元年。從睿王多爾袞。入山海關。破流賊。追至慶都。大破其衆。又與固山額真譚泰。肅章京德爾德赫。哈寧阿等。率噶布什賢兵。追流賊至真定。大破之。賊焚輜重。倉皇敗走。於是燕京迤北。居庸

關內外各城及天津真定等處皆降。二年正月。命多羅饒餘郡王阿巴泰爲總統。準塔以固山額真爲左翼。梅勒章京譚布爲右翼。率官兵往山東代和碩肅親王豪格。平定郡縣。二月。聞南京僞福王遣兵渡河。圍徐州沛縣李家樓。準塔等領兵星夜前往。敵人馬步兵二千有餘。屯駐徐州十五里外。我兵衝擊賊營。賊兵赴河死者無算。擒斬渠帥六人。安撫百姓。秋毫無犯。獲人口牛馬甚多。旋奉

命鎮守廬鳳淮揚等處。六月。疏報五月間。臣自徐州水

陸并進。適明將偽伯劉澤清。副將高祐。統戰艦攻宿遷。隨分遣官兵進擊。大敗之。師次清河。澤清所部總兵馬化豹。副將張思義等。率兵四萬。船千餘隻。據淮黃清三河口。連營十里。臣遣梅勒章京康喀賚。同遊擊范炳吉。天相等。率兵渡清河。列營相拒。擊敗敵艦。復遣都司楚進功。率步兵六百人。拒黃河北岸。鳴礮相應。又分兵兩路。一自清河上游進擊。一攻對岸。馬步敵兵俱敗之。合軍追至淮安界。斬其副將二員。叅將一員。師次清江浦。偽監司范鳴珂。攜勅印來降。澤

清同偽總漕田仰。各率兵丁家口登舟遁。偽總兵栢永馥。率所部及城中官民出迎。遂克淮安。其鳳陽廬州一帶。望風納款。臣隨領兵巡歷各處。安撫居民。委署官吏。是役也。共招降監司一員。總兵一員。副將二十三員。叅將二十五員。遊擊四十員。都司守備七十二員。獲船五百餘艘。馬九百餘匹。駱駝二十五隻。紅衣礮一百二十位。銀四萬七千兩。捷至。下兵部察議。三年四月。敘功。由三等梅勒章京世職。加為三等昂邦章京。是年。隨定遠大將軍肅親王豪格。征四川流

寇張獻忠大破之。陣斬獻忠。準塔復同貝勒尼堪。貝子滿達海。固山額真杜雷。覺羅巴哈納。馬喇希。燾章。京鰲。拜巴圖魯。墨爾根。轄哈寧阿。車。爾布。德爾德赫等。分兵征勦遵義。夔州。茂州。榮昌。隆昌。富順。內江。資陽等處。斬偽王及巡撫道官總兵副將參遊都司一千餘員。兵丁無算。獲馬騾一萬二千四百餘。川寇悉平。四年。凱旋卒。五年六月。敘元年以來功績。準塔巴圖魯。其敗敵二十四次。攻取五城。加世職為一等精奇尼哈番。因無子。以其弟阿喇密襲職。順治十二年十月。追諡開國功臣。準塔巴圖魯。諡襄毅。阿喇密襲兄職。遇

恩詔。歷加至三等伯。仕至內大臣。次子殷達。仕至副都

統。胡什布者。準塔巴圖魯第五弟也。初分襲父世職。得拜他喇布勒哈番。從征大凌河。陣亡。加一拖沙喇哈番。以其子呼禮襲。丹布者。準塔巴圖魯第八弟也。初任侍衛。歷陞至一等。又推伊父達爾漢轄之功。授為拜他喇布勒哈番。遇

恩詔加一拖沙喇哈番。康熙十三年。隨征逆藩耿精忠。

至江西。遇陳朱二賊帥。率賊兵六千餘。在鄱陽

八旗通志 卷一百五十三  
湖汊口村地方拒敵。丹布率本旗兵擊敗之。由拜他喇布勒哈番。加一拖沙喇哈番。遂授爲三等阿達哈哈番。又隨大兵征勦厄魯特噶爾丹。敗賊有功。加世職爲二等阿達哈哈番。丹布第四子拉薩禮。任整儀尉。從征福建海寇。戰于廈門陣亡。卹贈拖沙喇哈番。其第五子達吉。初襲父拜他喇布勒哈番。又一拖沙喇哈番。世職。從征雲南。以功加授爲三等阿達哈哈番。康熙三十五年。從征噶爾丹。又以功議敘。加爲二等阿達哈哈番。

康果禮額駙。滿洲正白旗人。姓那木都魯氏。世爲綏分地方屯長。

太祖高皇帝庚戌年十一月。

特命額亦都巴圖魯率兵千人。往東海渥集部之那木都魯。綏分寧古塔。尼馬察。四路。招其路長。康果禮與烏祿喀。明噶圖。巴顏。三人。首先來歸。

太祖嘉其慕義。賜金銀錦緞等物。康果禮因

奏請將伊弟喀克都里。哈哈納。綽和諾。依勒占。蘇爾休等五人爲首領。壯丁千餘人。將所居通肯。哈達。渾。褚河等處田宅。盡行棄去。率其民人奴

僕盡來歸附。

太祖大喜。遣大臣往迎。每日止宿處。俱設宴勞之。至之

日。

聖駕親往迎勞。旋以弟青巴圖魯貝勒女。妻康果禮。授爲額駙。又

特諭大臣言。那木都魯比各國號爲強盛。著將其人另編六牛彖。設捕獵者六人。康果禮與其弟喀克都里。并授三等總兵官。世職。哈哈納。授副將。世職。綽和諾。授遊擊。世職。伊勒占。蘇爾休。授守備。世職。天命三年四月。康果禮從大兵征明。取撫順。五月。取撫安。等十一堡。進鴉鵲關。破清河城。并在事有功。六年。從大兵征明。攻遼東瀋陽。康果禮設雲梯先登。遂克其城。十一年八月。

太宗文皇帝嗣位。設十六大臣。分理八旗政事。康果禮居其一。尋授纛章京。緣事罷免。天聰五年卒。子六人。次子麥色。以擺牙喇章京從征塔山陣亡。第四子賴塔。最知名。仕至都統。征南大將軍。自有傳。杭齊者。麥色之子也。順治十一年。挑選爲三等侍衛。十五年。陞二等侍衛。康熙七年。陞護軍叅領。十三年。從征逆藩吳三桂。由陝西進兵。



途。中。委。署。護。軍。統。領。十。六。年。陞。副。都。統。十。七。年。隨。安。遠。靖。寇。大。將。軍。貝。勒。尙。善。敗。賊。於。洞。庭。湖。論。功。授。拖。沙。喇。哈。番。十。九。年。陞。護。軍。統。領。二十。五。年。病。故。子。西。圖。庫。襲。

喀克都里。康果禮額駙之弟。

國。初。同。其。兄。康。果。禮。等。率。衆。來。歸。卽。授。三。等。總。兵。官。世。職。天。聰。元。年。從。征。朝。鮮。先。登。陷。陣。朝。鮮。人。畏。服。受。盟。旋。任。正。白。旗。固。山。額。眞。三。年。

太宗文皇帝親統大兵征明。十一月壬午朔。集諸貝勒羣臣定議。於初三日攻遵化城。以喀克都里率本旗攻東面之北。士卒奮勇先登。是日克遵化。旋敘功。

太宗以喀克都里造梯堅固。且親督本旗兵先登。

特召至御前。親酌以金卮。加授世職。爲二等總兵官。賞駝一。蟒緞一。素緞九。五年五月。

太宗發馬兵一千五百。步兵四千五百。以總兵官楞額禮爲右翼主帥。喀克都里爲左翼主帥。往征南海島。

特諭之曰。爾等所率之兵。總計雖多。然固山每甲喇各有主將管轄。以固山甲喇牛彖分轄之。則少。當加意。

八旗通志 卷一百三十二  
統理勿得懈怠。我與朝鮮爲交好之國。秋毫不可有犯。勿縱劫掠。至於招降島中漢人。爾等勿與其事。可令副將石國柱。高鴻中。遊擊佟三。李思忠等往招。如不降。則向朝鮮索舟攻取。倘朝鮮不與船。可令阿朱戶。馬福塔往諭之。六月戊辰。出南島遣人奏言。我兩路兵因朝鮮不與船隻。於二十六日起行而還。擒獲明人訊之。言黃總兵率兵五千。於五月五日。自內地來島中。又察哈爾率兩紅旗監守所。得小船。明兵來犯。穆世屯及二卒陣亡。我兵奮勇逆擊。敗之。復得其小船三隻。岸上明兵不能登舟。溺死者半。七月。與楞額禮率師還。以俘獲人畜。綉緞財物。盡賞陣亡被傷將士。有差。喀克都里勇敢善戰。

賜號噶思哈。言疾如飛鳥也。天聰初年。卽與兄康果禮。并在十六大臣之列。歷任至固山額真。嘗以功。賜漢人一千爲其屬下。六年病卒。緣事追革職銜。孫蘇滿。仕至都統。昂武者。康果禮額駙之弟。喀克都里之兄也。初同兄弟率丁壯來歸時。值

太祖高皇帝始編牛彖。卽以其來歸丁壯。分編六牛彖。令昂武管其一。又授爲甲喇章京。因人材壯健。

八旗通志 卷一百五十二  
置於十六章京之列。天命四年。隨大兵征葉赫。首先破敵。遂取葉赫城。以功授叅將世職。病故。以其子馬克圖承襲。馬克圖初襲父職時。

太祖高皇帝召見。嘉其人材壯健。因將宗室公達爾察之女格格賜與爲婚。至年十八歲。

太宗文皇帝授擺牙喇甲喇章京。崇德元年。隨征朝鮮。進攻平壤。乘船隨鰲拜。準泰船隻登岸。跳入平壤。以功再加一牛录章京。併原襲世職爲三等甲喇章京。同諸王貝勒等朝見。

太宗特諭。似此効死力之人。宜加優卹。如貧乏。務使富足。因賞玲瓏鞍馬。奴僕銀兩。緞疋衣服等物。尋以委署纛章京從征。率兵連取二城。以疾卒於軍中。以其子馬哈達襲職。馬哈達子海壽。歷官戶部尙書。

賴塔。康果禮額駙第四子也。順治元年十一月。任本固山擺牙喇甲喇章京。十三年三月。陞本固山纛章京。康熙八年六月。陞本旗蒙古都統。十二年十二月。吳三桂反於雲南。十三年三月。耿精忠亦據福建反。四月辛亥。

聖祖仁皇帝諭議政王大臣等。將副都統馬哈達。胡圖

部下兵。及將軍華善所分遣兵。以都統賴塔爲平南將軍統之。赴杭州剿禦。馬哈達。胡圖。并同叅贊。其杭州駐防官兵。仍聽將軍圖喇統轄。一切剿守事宜。賴塔圖喇商酌以行。時平南王尙可喜。疏請發兵。五月。聖祖特諭將軍賴塔。旣抵杭州。可與將軍圖喇。總督李之芳。提督塞白理。會商平陽衢州等處。緩急機宜。猶恐勢分力薄。其以駐劄江寧將軍阿密達。所轄包衣佐領官兵。令副都統喇哈達。領赴浙江。聽賴塔調度。時杭州將軍圖喇病免。以喇哈達代之。六月。

聖祖諭喇哈達及賴塔曰。爾等皆國家股肱大臣。委任封疆重務。凡事宜商確者。移會關通。協心謀畫。以副朕委任之意。勿各執己見。致有貽悞。務念國事爲重。用茂厥績。尋以康親王傑書爲奉命大將軍。同貝子富喇他。往浙江督師。將軍賴塔。副都統喇哈達。紀爾塔布。仍叅贊軍務。七月。耿逆賊兵犯金華。府。賴塔遣副都統馬哈達。雅塔理等。督官兵擊敗賊衆。八月。耿逆賊兵復犯金華。遣副都統喇哈達等。率領官兵往剿。自七月十三日至十八日。九次合戰。擒斬賊衆甚多。恢復諸暨義烏二縣。八月。同浙江總督李之芳。遣援剿總兵官李

榮領官兵至金華進剿。陣斬一千餘人。生擒一百五十餘人。焚其木城。副將鮑虎砍賊五營。乘勝恢復淳安縣。捷聞。并奉

旨嘉獎。下部議敘。十月。僞都督周烈。僞總兵桑明等率

賊二萬。由常山謀犯衢州。賴塔同總督李之芳遣副都統喇哈達。胡圖等統滿漢官兵。擊敗賊衆於焦園等處地方。斬賊萬餘。十二月。僞總兵桑明等復領賊五萬餘犯衢州。賴塔遣滿漢宮兵。於十一月二十四日連擊敗之。殺賊萬餘人。捷聞。并下部議敘。十四年三月。復遣副都統喇

哈達。胡圖。總兵官王廷梅等擊敗耿逆僞將軍馬九玉等賊衆於衢州。斬級萬餘。擒僞都司等。五月。耿逆賊兵屯扎前嶺。各路賊巢。互相應援。賴塔同總督李之芳。分遣正白旗叅領巴雅思呼朗。叅將趙德壽。領兵前至南塘萬青嶺等處。分路衝殺。擒斬僞都司千總等。八月。耿逆僞將軍馬九玉。遣僞副將李廷魁。率兵數千。屯扎衢州府北元口山上。截我餉道。賴塔分布滿漢官兵。攻賊木城內四營。圍其三面。乘夜攻擊。至天明。衝入。賊不能當。遂敗走。官兵追剿。斬獲甚衆。

焚其木城。又有逆賊盤踞衢州河西一帶。於十四日舉火。突犯駐防官兵營汛。八旗兵弁奮勇擊賊。自朶口追剿二里許而還。捷聞。下部議敘。十五年八月。耿逆僞將軍馬九玉等領賊衆數萬人。據守衢州河西。賊將林福等扎營大溪灘。輓運糧餉。奉命大將軍康親王傑書催促進兵。遂抵衢州。賴塔與總督等議。先斷賊餉道以奪其勢。於是月十五日。賴塔親率滿漢兵宵抵大溪灘。奮擊大敗之。乘勝進取江山縣。馬九玉大懼。棄營遁。賴塔率副都統馬哈達等。於二十日進至仙霞關。分路夾攻。次日僞參將金應虎等獻關迎降。官軍長驅而進。二十三日。攻拔浦城縣。時逆賊猶屯扎建陽。賴塔同吉爾塔布等。於九月初三日領兵進剿。擊敗賊衆。克建陽縣城。復進兵建寧府。賊遁。恢復府城。獲僞劄軍械無算。十月。隨康親王傑書大兵抵福州。耿精忠降。捷聞。得

旨嘉獎。下部議敘。十六年正月。同寧海將軍喇哈達等率領大兵。進剿興化。連破二十六營。陣斬僞總督趙得勝。僞總兵副將等六十一員。恢復興化。

府城。僞總兵郭維藩以仙遊縣來降。三月。康親王傑書選將士有馬者。令賴塔與喇哈達率之。同耿精忠先赴潮州。勦叛鎮劉進忠。六月庚午。

諭康親王傑書。據筆帖式塔穆哈圖報潮州劉進忠已於本月初六日投誠。今劉進忠復遺書吳三桂。平南王尙之信舉發。是劉進忠投誠本非真心。不過是勢窮就撫。且又總兵官劉炎所遺吳三桂書亦皆搜獲。其心迹與劉進忠畧同。此等皆心懷反側。久留潮州。必致生變。若果已投誠。康親王等卽託言欲與相見。以計撤回。留駐福州。設或遲疑未至。速行奏聞。劉進

忠等旣撤。則令將軍喇哈達以兵之半守漳泉。都統賴塔率其半守潮州。仍令尙之信遣原任潮州總兵官王國棟。盡率其標兵詣賴塔處協守。九月。康親王傑書疏言。漳泉諸處平定。臣等隨授賴塔平南將軍印。暫守潮州。十七年十月。海賊劉國軒犯泉州。賴塔率領滿漢官兵。敗之於柯鑑山。萬松關。十八年正月。劉國軒等復率賊兵八千。至郭塘。歐溪頭地方立營。欲斷江東橋以犯長泰。賴塔與總督姚啟聖。提督楊捷等統領滿漢官兵。直逼賊營。令副都統紀爾他布。巡撫吳興祚等。

八旗通志 卷一百五十二  
領兵擊之。大敗逆賊劉國軒、吳淑、何祐。追至江邊。斬首二千餘級。生擒偽總兵一名。偽副將二名。獲器械無算。三月。同昭武將軍福建提督楊捷等。至下杭山等處。擊敗海賊。多所斬獲。五月。劉國軒等復侵犯江東橋。賴塔統領官兵迎擊。賊敗走太平寨。率我兵進追。殺賊千餘人。先是。總督姚啟聖疏言。平南將軍賴塔久鎮潮州。兵民俱已心服。今在漳州。宜令兼轄潮州。

上允之。八月。賴塔疏言。臣身在漳州。與賊對壘。且滿洲大兵係大將軍康親王統轄。潮州地處遙遠。實

難兼轄。

上諭。成命已頒。仍令將軍賴塔兼轄潮州。如須用滿洲大兵。許一面酌量遣調。一面申報大將軍康親王。十

九年二月。賴塔以水師提督萬正色孤軍進剿海寇。遂會同總督姚啟聖等。分統水陸官兵七路。并將弁奮勇攻破陳州馬洲灣腰山觀音山展旗等寨一十九處。殺賊甚衆。五月。復會同提督侯襲爵率領官兵大敗海寇於潮州府之大濠堡磊石等處。又遣官兵追剿劉國軒等。克取銅山。焚毀賊巢。九月乙丑。



聖祖特諭議政大臣等。頃因逆賊侵逼四川。滿漢大兵已諸路進剿。大將軍貝子章泰。將軍總督蔡毓榮等。於是月十二日。以次進定貴州。今廣西一路。亟宜速入。以定雲南。將軍賴塔。在福建廣東。勞績素著。可授爲大將軍。赴廣西。調遣廣西滿漢大兵內。精銳有馬者。或五百人。或千人。親率之。赴南寧。廣西所有一應大兵。俱聽簡擇。率往。副都統博濟。統餘兵。暫守廣東。賴塔勅印。可速往送。其原在平南藩下官兵。如可帶往。聽賴塔酌量。率之前行。尋議覆。授賴塔爲征南大將軍。是歲冬。賴塔由趨廣西。率領大兵。由泗城進兵。抵西隆州。吳逆僞將軍何繼祖等。擁衆萬餘。距安籠所三十里。堅據石門坎隘口。拒敵。其地高出雲表。羊腸石徑。賴塔先令都統貝勒希佛。馬緝。護軍統領額赫訥等。以二十年正月初一日。率前隊官兵仰攻。自與副都統洪世祿。赫勒布。總督金光祖。分兵二隊。以繼其後。是日元旦。賊衆防守稍懈。遂大敗賊衆。斬殺甚多。奪石門坎隘口。恢復安籠所城。僞總兵陳義魁。率衆迎降。捷聞。得

旨嘉獎。下部議敘。賊將何繼祖等。自石門坎敗遁。至新

城所。會僞將軍詹養等。率衆二萬人。據黃草壩。驅象迎敵。賴塔於二月初二日。分布滿漢官兵。進戰。自卯至未。賊衆大敗。奪其營二十二。生擒僞將軍詹養。王有功。及賊衆千餘人。獲象馬無算。捷聞。奉

旨。賴塔自閩廣深入雲南。獨先諸路。大敗逆賊。調度有方。將士奮勇。殊屬可嘉。有功人員。俱從優議敘。賴塔復統大兵。自黃草壩抵曲靖府。僞總兵尹士元。僞道員劉世忠。率僞官投誠。卽於是日遣兵進取交水城。斷賊中路。僞將軍線絨等皆遁走。十

五日。分遣都統希佛。馬緝等。自曲靖府起行。恢復馬龍州。易龍所。十六日。復楊林城。聞賊於渾水塘。嵩明州等處立營。乃遣夸蘭。大石塔等。先勦嵩明州賊。奪門入城。賊遁走。追殺甚衆。生擒僞遊擊一人。守備二人。賊兵百餘人。是夜渾水塘屯賊亦遁。三月。與定遠平寇大將軍固山貝子章泰。綏遠將軍湖廣總督蔡毓榮等。大兵會合。分隊前進。先後至雲南省城東北四十里。營於歸化寺傍。二月二十一日。逆賊吳世璠遣僞將軍胡國柄等。率馬步兵萬餘人。出城列象陣。

拒戰。賴塔等率滿漢兵分隊進擊。自卯至酉。大敗賊衆。追至城門。陣斬僞將軍胡國柄。劉啓隆。及僞總兵九員。生擒六百餘人。獲甲仗旗幟馬匹無算。八月。賴塔疏言。進剿滇南時。曾留部兵每佐領三人。駐扎廣西南寧府。今雲南南寧相距甚遠。難以遙制。乞撤此兵還京師。得。

旨。雲南省城。尙未恢復。南寧之兵。不便撤。雲南南寧相距甚遠。難以遙制。此兵可令大將軍簡親王喇布兼轄。十月初八日。賴塔等統領滿漢官兵。進薄雲南省城下。并力環攻。賊勢惶迫無措。二十八日。逆孽

吳世璠自殺。二十九日。逆黨線絨等率衆出城降。遂擒首謀獻計之僞大學士方光琛等。至軍前磔之。戮吳世璠屍。傳首京師。僞官弁一千五百八十餘員。兵五千一百三十餘名。俱投誠。雲南平得。

旨。覽貝子等奏。統領滿漢官兵。遵奉成命。恢復雲南省城。疆宇蕩平。具見籌畫周詳。調度有方。剿撫并用。克奏膚功。朕心深爲嘉悅。著從優議敘。時僞將軍夏國相等。敗遁廣南。賴塔與貝子章泰。檄令土儂朋。及臨安總兵官李國樑。率師追剿。夏國相降。又

遣都統希佛追剿逆賊胡國柱等至雲龍州之青里屋。國柱自縊。僞帥王敘、李匡皆自焚死。僞將軍王公良等率餘衆來降。二十一年十月甲申，賴塔與定遠平寇大將軍貝子章泰自雲南凱旋至京。

聖祖特率在京諸王貝子公等、內大臣、侍衛、八旗都統、精奇尼哈番、阿思哈尼哈番及滿漢大學士、尙書、侍郎、學士等官郊勞。越蘆溝橋

駐蹕。乙酉復迎至二十里外，列燻鳴號拜

天行禮。二十二年十月庚申，吏部等衙門以尙之信名

下應入一婦女爲都統賴塔帶回，請取口供。

上曰：賴塔自福一，直抵廣東雲南，係効力勤勞，樹立大功之人，帶回婦女，事甚細微，無大關係，因此遂與衆犯一同取供。覺有未當，如事有牽連，應取口供。爾等親詢，勿因取口供以無禮加之，致失朕眷顧功臣之意。賴塔旣歸，仍任正白旗滿洲都統。二十三年十二月卒。

賜祭葬如典禮。又加祭二次，諡曰襄毅。雍正五年十月十三日，欽奉

世宗憲皇帝諭：正白旗原任都統賴塔，當三逆變亂時，

伊統兵征勦。克復雲南。功績茂著。朕恭閱

聖祖仁皇帝實錄。備悉其詳。因伊身有過犯。其功過適足相抵。是以未封公爵。給與阿思哈尼哈番。在國法實爲允當。且當日之不優封賴塔者。欲使立功之人。咸知儆惕收斂。不可恃功驕肆妄爲。今事歷多年。後人已知鑒戒奉法。著將賴塔追封爲一等公。令伊孫撥爾吞承襲。

瓦爾喀朱瑪喇。康果禮額駙之族人也。先世居瓦爾喀渾春地方。至朱瑪喇以材勇侍從。

太宗文皇帝持豹尾槍扈衛禁中。天聰八年五月。以其辦事有能。不違指使。授牛錄章京。世職。時葉赫亦有同名者。

太宗特賜名瓦爾喀朱瑪喇以別之。又

賜銀五百兩。奴僕十人。尋奉

命率噶布什賢十人。送巴爾圖奇額駙回原籍。半途遇叛逃蒙古。率伊妻子奔走。朱瑪喇追之。拿獲帶撒袋男子十七人。共家口四十三人。

太宗大喜。賞金珓一枚。銀盤四面。女子一名。所俘獲四十三人中。有名五十布者。一家共九口。仍賞給爲奴。崇德三年七月。從征額倫堯色生庫勒額

黑庫倫地方。於軍功俘獲人數外。多獲二十九人。論功加半個前程。是年從貝勒岳託征明。過北京。豎雲梯攻故城縣。同伊里布乘夜潛克之。遇明侯總兵來援。徒步殺入敵陣。右腿得重傷。二處。遇明太監高起潛兵。帶傷進戰。仍擊敗之。左脇又得重傷一處。旋送肅親王豪格出邊。遇明邊城兵來犯。同阿薩里步戰敗之。又遇明太平寨兵。同西圖從和碩達爾漢額駙兵。徒步先衝敵陣。持斧砍毀鹿角。推倒挨牌。手被砍傷不退。遂破敵兵。四年。從曹海沙慕什哈征撒哈連。吳喇獨俘獲二十九人。遂同和陀由雅克薩城邊放火處衝殺前進。撒哈連烏喇人叛奔博果爾。復合兵來戰。朱瑪喇同曹海伏兵擊敗之。五年六月敘功。加授世職爲三等甲喇章京。

賜鞍馬一匹。大莊屯一所。屯中家口共四十三人。七年。從大兵圍明錦州。明松山馬兵來奪我紅衣礮。卽率本甲喇兵奮擊敗之。其左翼未敗餘兵。復來圍繞我師。卽同雅爾納擊敗之。被紅衣礮子中領氣絕。

太宗震悼。賜宋錦御褥蟒被各一。以爲殮具。至第三日

復甦。奏聞。

太宗甚喜。令加意調養。傷愈。卽奉

命監造。

盛京塔工。塔成迅速。賞貂裘狍狽各一。馬一匹。銀三百兩。旋往防守哈達山寨。有敵兵來犯。竟夜拒戰。斬殺四十九人。獲甲三十九副。雲梯九架。挨牌七面。身被三傷。八月敘功。加授世職。爲二等甲喇章京。任吏部理事官。八年十二月。以考滿辦事有能。加授世職。爲一等甲喇章京。順治元年。從睿王多爾袞入山海關。擊流賊馬步兵大敗之。聞馬山。有土賊。卽往剿。見我兵駐立之處。有土賊來犯。卽同覺羅郎邱阿爾布尼擊敗之。二年二月敘功。由一等甲喇章京。加半個前程。十二月。隨定西大將軍何洛會進剿四川流寇。八大王張獻忠賊兵第一隊來拒。朱瑪喇首先奮擊敗之。何洛會卽於軍前委朱瑪喇署理梅勒章京。同尙書覺羅巴哈納。一路進剿。旋偕護軍統領阿爾津。蘇丹等。合兵大破賊衆。聞流寇高寨之衆。屯扎禮縣之南。卽同尙書興鼐等。擊走之。三年。

朝廷復以肅親王豪格爲靖遠大將軍。來征四川。朱瑪喇仍隨師進剿。十二月。官兵破賊於西充。陣斬張獻忠。尋下各郡縣。四年。凱旋。時何洛會方附會睿王多爾袞。構陷肅親王。朱瑪喇以不能依附。所有軍功。俱不許議敘。止。

賜銀七百五十兩。馬一百匹。莊地一所。共四十頃。又賞

黑爾根蒙古十人。六年。隨英親王阿濟格征大同。叛鎮姜瓖。至左衛。見城內賊兵沿壕而來。朱瑪喇迎擊敗之。又隨敬謹親王尼堪往太原。敗姜瓖。寧武關賊兵。賊於山岡後設火礮相拒。卽

率甲喇章京吳庫禮等。以其衆。七年。九年。三遇

恩詔。屢進爲一等阿思哈尼哈番。是年。實授梅勒章京。

十年。三月。卒於官。年五十三歲。以其弟伊瑪喇

襲所得世職。伊瑪喇早從征伐。屢立戰功。順治

三年。已任噶布什賢轄。與兄朱瑪喇并從靖遠

大將軍肅親王豪格。往定四川。任前軍護衛。賊

黨趙雲桂圍保寧。伊瑪喇與賊戰。注矢射雲桂

目。應弦倒。乘勝追擊。保寧圍解。四川平。我兵凱

旋。至十年。乃襲兄朱瑪喇一等阿思哈尼哈番。

康熙十三年。逆藩吳三桂據雲南反。四川爲賊



所陷陝西提督王輔臣亦殺經畧莫洛叛應之。十四年伊瑪喇以叅領充夸蘭大。隨揚威將軍阿密達往征。至寧州城外。賊僞總兵吳二、袁四率賊兵千餘人拒敵。伊瑪喇率綠旗官兵擊敗之。復隨平西大將軍平貝勒董額往攻平涼。距其城八里。王輔臣子僞總兵王繼正率賊萬餘人來拒。伊瑪喇隨大將軍力戰。從巳時至未時擊敗其衆。十五年五月。隨撫遠大將軍圖海攻平涼。奪城北護山墩。又敗僞總兵王繼正等。十八年六月。隨撫遠大將軍公圖海至益門鎮之西。

南山高處擊僞將軍陳君極敗之。因少一末等功牌。未及議敘。二十七年十月告休。三十四年五月病卒。長子能泰襲佐領。次子滿色襲一等阿思哈尼哈番。伊瑪喇與兄朱瑪喇并以平定四川功德在人。崇祀四川名宦祠。六十一年十一月。

恩詔。凡効力行間將士。若有少一二功牌未得官者。著該部查明具奏。兵部查議。將伊瑪喇少一末等功牌。未得官情由具奏奉。

旨。伊瑪喇係血戰有功之人。殊可矜憫。特賜拖沙喇哈

八旗通志 卷一百五十三  
番。仍與長子能泰承襲。能泰仕至都察院左都御史。  
次子滿色仕至副都統。

八旗通志初集卷之一百五十三

名臣列傳十三

正白旗滿洲世職大臣二

吳拜

父吳禮戡

郎談

蘇拜

子和託

吳拜滿洲正白旗人。姓瓜爾佳氏。先世居義屯。宜爾門地方。至祖伊蘭柱。徙居哈達之裴德里。父曰吳禮戡。

國初來歸。屢立戰功。歷官至噶喇昂邦。

賜世管牛衆。

太祖高皇帝癸巳年九月。葉赫烏喇哈達輝發會同瓜爾剎席北及蒙古科爾沁等九國來侵。吳禮戡奉

命往偵之。行百餘里。忽有烏鴉數萬飛集馬前。鳴噪若相阻者。吳禮戡心異之。馳還奏聞。

太祖言此必有故。爾不可復行此路。可從查開城至呼諾河往偵。吳禮戡遵。

諭前往。是晚見征塵蔽空。策馬登山望之。果諸國入寇之兵也。細察其首尾。飛騎還報。

太祖謂暮夜派兵。則人心震動。俟天明集兵可也。爾再往偵探敵兵實數。還報。吳禮戡馳往。擒敵人一哨卒。以歸。訊之。乃葉赫人。言諸國兵共三萬。我兵聞之失色。

太祖授意傳諭以安衆心。吳禮戡出大聲呼曰。敵雖衆。其心不一。非我輩敵也。我國人勇膽烈。一心一力戰則必勝。馬匹器械得必無算。敗此輩之後。再無我兵敵也。言畢。衆心遂安。鼓舞而前。大敗敵衆焉。天命四年。明大發兵分四路來侵。

太祖親統大兵。敗其三路。明經畧楊鎬大懼。急調李如栢一路未敗者。撤回瀋陽。如栢回兵至虎攔地方。適吳禮戡時爲大兵前哨。巡邊至其地。所率勁騎僅二十人。因策馬上山。將巾掛於弓梢。四顧指麾。大聲疾呼。僞作指調伏兵之狀。敵衆大懼。潰奔。吳禮戡率二十騎飛馳下山。直入敵隊。斬殺甚衆。得馬五十匹以歸。尋以積勞卒。吳拜。

其長子也。生而英勇。

太祖庚戌歲。吳拜年十六。偕丹布往畧明撫順所。遇明哨卒。先衆衝入敵隊。矢中其額。

太祖愛其材。戒其毋恃勇輕敵。然吳拜每從征伐。必奮勇先登。亦未有不中傷者。是年隨

駕獵多卜。顆舒爾黑地方。一巨熊突圍出奔峻嶺。有一人獨策馬逐之。圍衆危懼。皆疾聲大呼。其人所乘馬懼熊不進。乃下馬步射之。中熊貫胸墮嶺下。

太祖遣雅孫巴圖魯往視。曰。非朕之吳拜不能視之。果然。

太祖駕至熊斃處。卽燔肉進午膳。顧謂諸皇子曰。此子舉動。爾等親見。朕素昔稱獎。寧有謬乎。卽授以轄職。代父吳禮戡管牛彖事。是年。

太祖征葉赫。攻城之時。敵於城上遮射我軍。吳拜帶重傷。力戰不退。大軍並進。遂滅葉赫。

太祖大悅。賜良馬一匹。是年秋。

太祖將出獵。

命吳拜往靖邊境。諭之曰。爾此行遇我逃人。必盡擒之。謹防奸細。窺我邊界。吳拜行三日。得逃人踪跡。追至

叢木中得八十餘人。言從孟財主往海島投毛  
文龍。其首領孟財主者。策騎遁入山。遂抄逕追  
及射殺之。擒其妻子。并八十餘人而還。奉

旨嘉獎。將所獲人畜財物盡賞之。六年。隨大兵征明。至  
遼東。攻南壽山。首先破敵。又於各處追明哨兵。  
斬獲甚衆。敘功。授牛条章京世職。是歲定遼東。  
凡一等大臣。皆分隸漢俘千人。

太祖言吳拜父吳禮。戡隨朕開創。殫心竭力。推鋒陷陣。  
幾死復生者數次。今其子吳拜。髫年超衆建功。故授  
職最早。着與諸大臣一例。分賜漢俘千人。尋從征囊

努克。有敵車百餘輛。衆百餘人來拒。擒我偵者  
一人。吳拜率兵追及。盡殲之。獲其輜重。及我偵  
者而還。有薩譚牛条下一人。刺殺二人。奔入  
宮殿。吳拜徒手執之。十一年。

太宗文皇帝踐祚。欲妻以公主。吳拜奏稱  
先帝欲降公主於臣。臣辭以

皇恩既不克當。而臣妻素與臣和睦。已蒙停止。伏乞  
聖恩。諒臣本懷。乃止。天聰元年正月壬午。杜度貝勒所

屬巴卜。富喇塔。二牛条下蒙古十五人。自奉集  
堡亡去。吳拜同阿達海。康喀賴追之。至都爾鼻

八旗通志 卷一百五十三 五  
地方追及交戰。盡殺之。吳拜被創。事聞。

太宗特諭曰。吳拜之賢。

皇考在日。曾蒙嘉獎。特未及陞用耳。觀此洵屬賢能。若他人必致縱脫矣。因優賞之。五年十月壬寅。同蘇達喇率每旗官各一員。精兵二百五十名。略明境。至錦州。一路捉生。殺八人。擒九人來獻。訊之。言吳總兵金副將桑阿爾寨。偕百人遁去。其餘衆官盡爲我兵所殺。孫閣老及太監二王公。從錦州奔入關內。六年四月。大兵征察哈爾林丹汗。吳拜以噶布什賢章京隨征。奉

命同喀山率兵八十名往調回前所遣阿山。圖魯式勞薩等。於是大兵趨歸化城。五月戊戌。奉

命同阿山。圖魯式勞薩留其前次所統兵丁。別領精兵

三百。前往捉生。癸卯。大兵次胡喇地方。詹土謝

圖下蒙古五人。私逃奔察哈爾。吳拜與阿山追

獲之。斬首以獻。甲辰。六兵次布龍圖布喇地方。

吳拜同他哈布率精兵九十人前進。八年六月

辛酉。杜稜濟農下一人。乘馬私逃。吳拜執之以

獻。丁丑。噶布什賢將領梅勒章京圖魯式等。率

噶布什賢兵。往喀喇沁地方。覓從前貿易遺失

八旗通志 卷一百五十三  
六  
踪跡獲其原物而還。甲申復隨噶布什賢將領梅勒章京圖魯式等率兵歷歸化城招撫察哈爾逃來人民約於朔州合兵八月戊辰。

太宗率和碩墨爾根代青貝勒多爾袞額爾克楚虎爾貝勒多鐸豪格貝勒每隊擺牙喇兵二名及科爾沁國土謝圖濟農查薩克圖杜凌孔果爾馬法吳克善卓禮克圖台吉滿朱習禮達爾漢巴圖魯等率精兵往視大同城吳拜同圖魯式等噶布什賢將領前行隨執大同哨卒十人獲馬四十餘匹八月戊辰。

太宗遣多爾濟額駙俄齊爾泰率二十人爲中軍噶布什賢將領圖魯式等爲左軍吳拜等爲右軍擊明總兵曹文詔兵敗之追殺至城壕而回獲馬百餘匹閏八月乙酉同席特庫薩海於宣府設伏邀擊明總兵祖大樂哨卒斬二人生擒守備一員獲馬三匹壬辰奉

命制國勇柯什達爾漢額爾德尼囊蘇等八大臣率兵百名往偵察哈爾子額爾克孔果爾消息九年以甲喇章京隨額爾克楚虎爾貝勒多鐸證明率兵入明廣寧地方吳拜與昂邦章京阿山石



廷柱甲喇章京圖賴郎邱察哈爾等率兵四百先趨錦州。多鐸統大兵隨後。過十三站立營。明偵卒見我兵至錦州。總兵祖大壽急聚部下各官。令副將劉應選、穆祿、吳三桂、叅將桑噶爾寨、張國忠、王命世、古明顯及遊擊八員率兵二千七百名迎探。大壽親率馬步兵出錦州城五里立營。時松山城守副將劉成功、趙國志率兵八百與錦州副將劉應選等合兵來至大凌河西。與我前鋒阿山、石廷柱等所率兵四百名遇。相對列陣。俱不敢交鋒。阿山、石廷柱等以我兵寡

馳報多鐸。多鐸遂率兵馳赴。明諸將見我軍形勢如木石自山而下。塵土蔽天。不知多寡。遂大驚奔潰。吳拜與阿山、石廷柱圖賴率所領兵四百突入掩殺。兩路追擊。斬副將劉應選兵五百名。盡殲之。生擒遊擊曹得功。及守備三員。獲馬二百一十匹。甲冑無算。距錦州松山五里收軍還。次日克其城南一臺。師旋。明兵來追。吳拜又設伏敗之。敘功。加世職為三等甲喇章京。七月甲戌。吳拜與納海、張屯、布丹率兵一百往代駐防上都海塞。十年與勞薩同奉

命往明喜峰口。潘家口。齎書與明人。三月。還遇明邊外。哨卒二十五人。斬二十三人。生擒二人。獲馬十匹。先是吳拜等齎書往明邊口。瀕行。

太宗諭之曰。爾等所統兵丁之馬匹俱肥壯。慎勿馳驟。致有倒斃。勞薩等違命縱獵。往來斃馬十九匹。至是兵部叅政蘇爾邁喀木戚哈審實奏聞。

命碩翁科羅巴圖魯勞薩。吳拜均坐以應得之罪。倒斃馬匹。着管噶布什賢官賠補。其所俘獲馬十匹。仍給與之。崇德元年十二月。

太宗親征朝鮮。己丑。往圍其王京。吳拜與馬福塔勞薩。碩翁科羅巴圖魯等率兵前行。有朝鮮二副將。四遊擊。六備禦。率精兵六千餘來戰。吳拜等擊却之。進抵王京。朝鮮崔尚書李侍郎迎於城外。問曰。爾等之來何爲。吳拜等答言我等奉

皇上命。與爾王有事相議。崔尚書李侍郎曰。旣爲議事而來。俟吾啟王以禮相迎。遂設宴來迎。以緩我師。其國王潛遁。吳拜等追四十餘里。至南漢山城圍之。十六日。豫親王多鐸。貝勒岳託皆至。環繞圍之。有敵兵將入南漢城。吳拜等截殺二百餘人。二年二月。朝鮮稱臣降。乃還。四月。以追逃

人功。加世職爲三等梅勒章京。尋緣事革世職。是年。

國家新設十六大臣議政。吳拜與焉。又授噶喇昂邦。八月奉

命出張家口。迎接歸化城貿易之丹岱等。遇明哨探弁卒十六人。斬十五人。生擒一人。獲馬十九匹。奏聞。三年。從征。明得重傷。

特受三等甲喇章京世職。五年五月奉

命同勞薩。碩翁科羅巴圖魯。率噶布什賢兵。及每旗下轄十人。在畧海邊一帶。由中後所北面入。勞薩

駐兵西面。吳拜駐兵東面。分兵一半沿海搜畧。獲馬三十四匹。牛一百六十三頭。驢四十頭。人十六名。殺二百二十人。是年陞噶布什賢左翼噶喇額真。七月。率噶布什賢官兵一半。往助和碩睿親王多爾袞等征明。圍錦州。

太宗諭曰。爾等速行。分兵二隊。其後隊。令納海蘇爾德統之。前隊尤宜急往。爾等一營。須擇險要地方屯駐。若遇敵時。更視敵將突出之所。列陣以禦。并傳諭和碩睿親王。肅親王。伊等前次迎戰擊敵。殊爲失策。敵兵前來。但固守營壘。俟其相近。乃可擊之。八年。從貝

勒阿巴泰征明。至山東。十二月辛未。敘征山東  
錦州等處功。加世職爲二等甲喇章京。順治元  
年。隨睿王多爾袞入山海關。大破流賊。二年正  
月壬子。敘克明北京。破流賊。及追敘克錦州松  
山等處功。加世職爲一等梅勒章京。任內大臣。  
三年五月。隨豫親王多鐸追騰機思平之。十一  
月戊申。奉

命同輔國公鞏阿岱及內大臣何洛會等率官兵征宣  
府地方。四年三月丙寅。敘平騰機思及破流賊  
功。加世職爲一等昂邦章京。七年遇

恩詔。陞爲二等伯。世襲罔替。尋以羅什博爾輝等得罪  
牽連。降世職爲一等精奇尼哈番。康熙四年四  
月初二日病故。時年七十歲。

賜給葬銀五百兩。八月二十七日。奉

旨遣禮部侍郎察不害讀文致祭。八年。

賜諡曰果壯。遣工部於墓前立碑。其一等精奇尼哈番  
世職。以長男郎談承襲。

郎談。吳拜子。十四歲。卽任三等轄。隨侍

內廷。十六歲。陞爲二等轄。是年爲順治六年。從征  
大同。叛鎮姜瓖。至渾源州。城壕中有一賊人。執

刃浮水而來。郎談見而射之。中心死水中。明年以功陞頭等轄。尋因父罪革職。九年。八等。世祖章皇帝特恩復授三等轄。十年。陞二等。十八年。陞爲頭等侍衛。康熙元年。進爲侍衛首領。二年。代父管佐領。陞護軍叅領。是年。從定西將軍都統圖海。往湖廣。征茅麓山賊。從房縣進兵。同鑲藍旗護軍叅領葉出赫。率八旗前部勁兵。渡谷平河。深入敵境。擒其僞官宋軍門孫大廳等。十一人。并得其劄付而還。四年。父歿。襲父一等精奇尼哈番世職。十二年。復爲頭等侍衛。尋拔爲親軍侍衛。復授內廷侍衛首領。陞親軍侍衛統領。是年二月十二日。陳二道。王二仙等。於都城立十壇。興異教。曰弘陽道。煽惑愚衆。從者風靡。事聞。

聖祖仁皇帝密諭郎談。率侍衛興德。常泰等百人。往擒之。未及天明。都城內外黨衆。悉按籍就擒。以功賜御衣一襲。十三年八月。邊外賊飛腿張四等。於板城等處。屢擾居民。郎談奉

旨查邊。突入其窠。盡殲之。歸。

賜御衣一襲。十四年八月。

賜御書忠孝二大字。十七年四月奉

命頒詔朝鮮還。

聖祖賜御製詩一首。并御書手卷金扇。十九年。陞蒙古

副都統。二十年。轉滿洲副都統。二十一年八月。

奉

命同一等公彭春等。率兵往打虎兒索倫。聲言捕鹿。以

覘羅刹形情。將行。

聖祖面諭之曰。羅刹犯我黑龍江一帶。侵擾虞人。戕害

居民。昔發兵進討。未獲剪除。近聞蔓延益甚。過牛滿

恒滾諸處。至赫哲飛牙喀虞人住所。殺掠不已。爾等

此行。除自京遣行叅領侍衛護軍外。令畢力克圖等

五台吉。率科爾沁兵百人。寧古塔副都統薩布蘇。率

寧古塔兵八十人。往打虎兒索倫。一面遣人赴尼布

潮。諭以捕鹿之故。一面詳視陸路近遠。沿黑龍江行

圍。徑薄雅克薩城下。勘其居趾形勢。度羅刹斷不敢

出戰。若以食物來餽。其受而量答之。萬一出戰。姑勿

交鋒。但率衆引還。朕别有區畫。爾等還時。須詳視自

黑龍江至額蘇里舟行水路。及已至額蘇里。其路直

通寧古塔者。更擇隨行之叅領侍衛。同薩布蘇往視

之。諭畢。解所衣狐白裘褂。及弓矢以賜。十二月疏上

平羅剎之策。言臣等謹密奏。爲雅克薩可下。羅剎可破事。臣等奉

旨從達湖里墨勒根諸邊圍獵而行。凡十六日。至羅剎雅克薩城。途間細察地形。雖無險山。而林木叢雜。冰堅沙結。自興安至雅克薩城。大概如一。料冬雪之時。未可前進。夏月雨潦。淤泥阻路。除輕裝疾行外。凡百重載。一概難行。臣等從黑龍江順流回。凡十五日至愛渾城。觀水勢從愛渾至雅克薩。舟楫可通。無險阻之患。兩岸俱可擗纜而行。從愛渾至黑龍江。松阿里江會合處。馬行

可半月程。從兩江會口至雅克薩城。馬行可一月程。舟行逆流可三月程。舟行雖稍遲時日。凡軍餉重器。皆可致於雅克薩。昔羅剎於烏查拉作木城居時。寧古塔副都統海色擊之失利。後羅剎復於呼馬立河口立城。都統明安達禮往攻之未下。從此羅剎倚木城爲重。以爲坐待無虞。今臣等愚意欲取雅克薩諸城。非紅衣礮不可破。記奉天府有紅衣礮數座。若速遣官至奉天府。得二十礮。卽可濟用。俟來春冰未融化之時。預運於吉林江口。臣又訪得黑龍江船數大

八旗通志 卷一百五十三  
船四十隻。小船二十六隻。大船逆水遲滯。可載糧餉後行。若與陸兵接應。緩急未便。今小船僅二十四隻。應再造小船五十六隻。除出兵事宜糧用幾何。應候

旨。裁定外。紅衣礮必趁地凍之時。預運至湖勒海河口。俟來春冰解時。水陸軍刻期齊發。旋奉

旨。據郎談等奏。攻取羅刹甚易。發兵三千足矣。朕意亦以爲然。第兵非善事。宜暫停攻取。調烏喇寧古塔兵一千五百。並置造船艦。發紅衣礮鳥鎗。及演習之人。于黑龍江呼馬兒二處。建立木城。與之對壘。相機舉行。所需軍糧。取諸科爾沁十旗。及席北烏喇之官屯。約可得一萬二千石。可支三年。且我兵一至。卽行耕種。不致匱乏。黑龍江城。距索倫村不遠。五宿可到。其間設一驛。俟我兵將至。淨溪里烏喇。令索倫接濟牛羊。甚有裨益。如此。則羅刹不得納我逋逃。而彼之逋逃者。且絡繹來歸。自不能久存矣。二十二年。陞左翼前鋒統領。是年七月。奉

旨。朕前所言與雅克薩對壘成城。厄蘇里處立木城。置兵屯守。並兵餉之故。爾可馳驛至寧古塔。與彼處官員人等。詳察其事。以聞。郎談遵



旨至寧古塔。與將軍等會議詳明奏覆。二十三年緣事革前鋒統領。二十四年羅利猶屢於俄洛春索倫飛牙喀赫哲等邊劫掠。

特旨授郎談監軍副都統之職。同親軍侍衛官保副都統班達里沙一等公彭春寧古塔副都統薩布蘇等統兵往征。

聖祖諭云。郎談兵至雅克薩城。羅利或迎降。或戰而後降。慎勿殺戮。告以恩旨。遣歸。諭云。當今皇上。乃萬國之主。仁慈之君。不忍以今次過犯。殺戮爾等。爾等務須體我皇上仁慈之心。再勿如前犯我邊界。

諭畢遣行。五月二十日。兵至杭屋莫。先遣費咬多里等

三人往雅克薩城。遵

旨諭其酋長厄里克什。二十二日至雅克薩城。呼其酋長。諭以

皇上好生。不嗜殺戮等語。羅利負固。出言不遜。郎談同官保班達里沙公彭春等。週覽其城。環視地勢。還營。二十四日早。從江水上流。見乘筏羅利四十餘人來。欲入城。因遣護軍叅領雅勒泰等往招之。使降。不從。遂持兵器來犯。雅勒泰直躍上筏。格殺三十餘人。擄其子女十五人。捧筏而還。

是晚郎談同官保班達里沙等分遣副都統雅欽營門校尉胡布諾等於城南進兵設擋牌土壘施放弓弩作欲攻之勢又令副都統溫代護軍叅領瓦哈納漢軍提督劉兆奇等潛進紅衣礮於城北攻之又令護軍叅領博里秋營門校尉烏沙綠旗左都督何悠等於兩翼放神威將軍礮夾攻之又令副都統雅齊納鎮守打虎兒提督白克進戰船於城東南以備水戰攻至次日巳時見城未能卽下遂令城下三面積柴將焚城其酋長窮迫始遣人求降郎談同官保班達里沙等議以

皇上體天地好生之心欲以德服外國臨行

上諭正宜欽遵遂受其降願歸者六百餘人并其器物悉與遣歸諭云我

皇上視天下如一家萬方如赤子不忍剿滅爾等從今

以後勿萌異念羅刹厄里克什等稽顙而去乃

遣副都統班達里沙溫代送至厄里古納地方

中有沐仁化不願去者巴什里等四十五人並

率其妻子以歸又前羅刹擄去索倫巴爾虎等

處男婦共一百六十餘口盡皆遣回本地焚其

城郭廬舍刈其田禾六月捷聞。

聖祖諭大學士勒德渾學士麻爾圖圖納等俄羅斯入我邊塞擾害俄羅春索倫黑真飛牙喀等處人民搶掠其家口。雖屢肆兇暴朕不忍遽興兵革故未卽遣發大兵征討。數遣使曉諭俄羅斯恃其遼遠仍復抗拒益侵犯我邊鄙之人肆虐不止。用是遣大兵直抵雅克薩之城。彼因困迫已甚而後歸降。爰遵朕命宥其困而後降之罪。釋之。使遣大兵迅速征行。破四十年盤踞之俄羅斯于數日之間。獲雅克薩之城。克奏厥績。今進剿官兵殊屬勞苦。令伊等暫回吉林烏喇地方。于盛京打虎兒之兵酌量派往防守。至雅克薩城雖已克取防禦決不可疎。應于何地永駐官兵彈壓。此時卽當定議。著大學士勒德渾學士麻爾圖圖納同郎談官保與議政王大臣等會議具奏。次年理藩院郎中滿丕擒得羅刹鄂克順科。因知羅刹復於雅克薩故址用土塊築城嚴守。屯田如初。具摺奏。

聞四月初五日。

聖祖命郎談及班達里沙官保等再往征剿。獨召郎談至。

八旗通志 卷一百五十三  
乾清宮。

一面降諭旨云。爾等此行宜慎之。當如前降旨曉諭。爾羅刹外國人。貪利棄命。擾我邊疆。今大兵復至。當速降。如不降則盡誅之。若得雅克薩城。卽往尼布抽。事畢。還駐兵於雅克薩過冬。勿毀其城。亦勿損其田禾。俟禾熟收爲我餉。旋

賜內帑銀三百兩遣行。五月初三日。兵至黑龍江。十四日。至門第茵。郎談同副都統班達里沙。馬喇親軍侍衛兼郎中官保黑龍江將軍薩布素。商議自厄爾合河水陸分兵。進攻雅克薩城。是日於路擒得羅刹偵者四人。二十八日。水陸兵齊集。本克丹處進逼雅克薩城。如前降

旨宣諭。不從。敵衆潛出於城壕邊。放銃礮。遙擊我師。監

軍郎談率護軍叅領馬世基。以龍礮擊之。始退

六月初一日。郎談進兵於江之西岸。令水軍據其上流。初四日。郎談夜率衆兵於城北。以紅衣礮攻之。遣副都統班達里沙。雅欽等。由城南麾兵薄之。賊出城逆戰。班達里沙等擊敗之。遂直逼城下。自夜攻至旦。城堅不能下。初六日夜。遣殷達渾。副叅領朔葛色等。率兵往探。遇敵伏兵。

共擊敗之。初八日。郎談夜率副都統溫伏。白克邊武禮。殷達渾。領藤牌軍綠旗官楊士茂等。往取其城南土阜。遇敵。敗之。卽於土阜設伏兵固守。初九日。郎談復以夜領兵抵江濱。逼城下壘。賊於城上以銃礮護其地。我師以礮矢仰攻。一夜築壘成。伏守兵三處而還。初十日。敵乘大霧來爭土阜。我伏兵齊起擊敗之。十二日。敵復乘霧出爭。又擊敗之。郎談謂衆將云。若不斷其水道。則持久難爲力。因率副都統班達里沙。進兵直抵賊城。掘長塹立土壘以困之。於

是敵急。又恐失水道。鏖戰四晝夜。擊死酋長厄里克什。塹壘乃成。設兵嚴守。七月初八日。敵衆出城來奪城北礮臺。被守臺兵擊敗。生擒二人。羅刹自此敗後。不復出戰。於是合水陸軍。過城作長圍困之。郎談又於城南北二處。築高臺架大礮。欲攻其城。臺始成。鄂羅斯國王察罕汗。因勢窮事迫。遣使詣

闕謝罪乞降。請釋雅克薩城圍。後卽遣使來交地界。

聖祖特旨遣親軍侍衛馬武。同其使至營降。

旨乃釋圍。十月回駐大營。合兵防守。十二月十一日。羅刹酋長孟敦遣人來求飲食。因遣驍騎校宜番等往給飲食。因察其虛實動靜。人還言孟敦已病危。惟餘二十餘人。亦皆羸病。二十六年四月初六日。退二十里。於查克丹駐營。二十三日。孟敦求種近城地。郎談以其使者未至。地界未明。不許。七月十一日奉

旨。羅刹講地界人未至。我兵且於寧古塔駐扎。九月十四日。陞蒙古都統。二十七年四月奉

旨。偕班達里沙領黑龍江兵一千五百。往察羅刹動靜。六月二十三日。至查克丹。率輕騎五百人。疾驅至雅克薩城。故。環視其城。殘壞如故。惟種田千有餘頃。因呼其酋長鄂母色法里等出。而責之以違令種田之故。彼酋長無言。惟叩頭而已。因有

恩旨。不加誅戮。還營。明日。督兵過雅克薩城。留水陸兵屯色沁。七月初三日。率輕騎數十人。至厄里谷諾。遍視田無播種。廬舍無人。遂還。明日。兵退至雅克薩。逼城駐營。呼出酋長鄂母色法里等。責之曰。前者大兵困爾城。死亡殆盡。因爾察罕汗

遣使詣

闕請罪。

皇上降恩旨。釋圍退兵。俟爾使者來講地界。爾使未來。真實未見。爾何得擅種田禾。語畢。遂麾兵盡刈其田禾。投之江流以歸。二十八年三月。郎中伊道報鄂羅斯國使臣費咬多羅。於今春至尼布抽講地界。奉

旨遣議政大臣索額圖。都統舅舅佟國綱。阿禮奈。馬齊。同郎談。班達里沙。馬喇薩布素等。同往議界。索額圖。佟國綱。馬齊等。兵由陸進。郎談與班達里

沙。薩布素等。領水軍由黑龍江進。臨行。

聖祖賜御衣。蟒袍。寶刀。弓矢。麩韉。並御騎鞍馬。綵緞五疋。仍

諭相機而動。復

賜八大龍纛以行。四月初九日。至黑龍江。派船隻百號。裝載龍礮軍器等物畢。二十四日開纜。先將所騎馬匹。令護軍叅領鄂色羅里白等。從努民地方。抄路至尼布抽會齊。五月十八日。至雅克薩城。觀其城仍未修理。田種三分之一。呼出酋長鄂里的野馬論云。去歲爾國使人未至。故刈爾

禾今聞爾使旣至。不刈爾禾。爾等俟熟而收之。其酋長等俱歡呼羅拜而去。六月初十日。至尼布抽城。於對岸合水陸軍駐營。遣署叅領白莫多等三人入城。問其使者至否。回云。尚得一二日。十六日。羅刹使臣費咬多羅。與尼里克西耶至。先遣其屬官洼西里耶。至我營請安。自陳路遇潦水。遲悞時日。並請定於某日某處相見。郎談與索額圖。佟國綱。班達里沙等。議定相會之處。遣其人還。七月初四日。羅刹使臣費咬多羅等。至尼布抽城。約以初八日相見。講地界。去我營五里許。去彼城亦五里許。設幃幕見焉。是日大臣盡衣禮服。從官畫錦衣佩刀相從。旣相見。語其使曰。里雅那江。原係我疆界。以此爲界。何如。費咬多羅不從。次日議。又不成。盟第三日。郎談見費咬多羅。語意不遜。乃密向諸大臣曰。臨行時有。

密旨令相機而動。今觀羅刹北以兵威勒之。不可。今夜我潛率八旗與寧古塔勁兵渡江。設伏於其域近林谷中。天明諸公試往講之。從則已。設再不從。以兵威懼之。事可濟也。是夜天未明。兵盡渡。



八旗通志 卷一百五十三 名臣列傳十三 初集  
伏於林間。侵晨。諸大臣仍至幕所。講至日中。猶不從。郎談因將

上賜八龍燾。給八旗護軍等執之。督衆旌旗於週林谷中出入。以張聲勢。羅刹等大懼。始乞盟。遂與費咬多羅軟血盟於城下。自厄里谷納河口以上。至黑龍江北岸。自格爾必齊河以上。至興安嶺以抵海。定疆界而還。七月二十六日。郎談與陸路諸大臣分行。與羅刹使臣費咬多羅取得移雅克薩城所居諸羅刹印信文書。開船順流而下。八月初三日。至雅克薩城。自初七日起。毀其

城郭廬舍。二日畢。乃給羅刹船隻糧餉以歸。羅刹孟敦詣營叩謝。復厚賞之。諭以

皇上隆恩。衆皆免冠稽首。感泣而去。師還奏稱

旨。二十八年十月。遷滿洲都統。二十九年三月。奉

旨。同副都統詔三往厄里谷納河口。立交界牌。五月十

五日。經默爾根城。越興安嶺。見羅刹猶有屋十

餘間。田禾滿地。因呼其酋長巴什里問其故。對

曰。去歲尼布抽城長有印信來。令我等回去。因

我等移家力量不足。故冒死於此地。少種田禾。

意爲收種之計。并乞大人憐宥。郎談使毀其屋。

給其資。允其刈禾載歸。羅刹等悅拜。度嶺而去。二十一日。至厄里古納。立牌於河口石壁上。鐫清漢鄂羅斯蒙古里的諾五樣字。畢而還。是年古北口邊外山賊楊花臉等。聚衆爲患。九月朔。特旨命郎談率親軍侍衛合吉禮根。二等侍衛常官保。護軍叅領班第。守備劉光祖等。領勁兵百人往。勦。初八日。至新幃子。得賊消息。追至龍胥門。賊依崖放銃。礮滾石。相拒。郎談指麾親軍侍衛等。前後進攻。遂奪其崖。擒賊楊花臉等。盡殲之。三十年二月初一日。

聖祖諭郎談云。去歲噶爾丹雖乞降。然此賊險詐。或乘我不備。處來擾。不可不預防也。今命爾統兵於大同駐防。授安北將軍職。一切事務。可與叅贊宗室公華善。都統李正宗。宗室懷蘭。副都統副前鋒統領朔柰。副都統馬齊。田象坤。郎化麟等。商議而行。

陞辭日。召見

乾清宮。郎談奏言。臣此去若有事機。一面施行。一面奏聞。

聖祖許之。初三日啓行。十三日兵至大同。疏上防禦事。言臣於京都起行時。原奏馬得青草時。率兵出

邊。於歸化城駐扎。以備防禦。臣自受重任以來。日夜憂懼。細察地圖。知黃河自蘭州城東北流。經寧夏出塞。至噶爾拜郭泌。復南流入邊。因有旨令喀爾喀等。近邊屯扎。倘噶爾丹入寇。必不由故路而回。必順黃河沿西行。奔阿蘭善山金塔寺等處。臣若領兵從歸化城往追。非一時可至也。臣意欲領大兵於黃河喀喇摸倫河相會處駐扎。前據黃河。後倚噶爾拜郭泌。勢同重關。內可障邊。外可禦寇。若噶爾丹入寇嘉峪關諸境。臣從甘肅往援。路亦甚便。若恐日久兵餉難致。可用寧夏蘭州渡船遞運。凡百重器。俱可至也。疏上。得

旨甘肅寧夏等處。已遣總督總兵屯兵駐防。將軍郎談領兵至歸化城駐扎可也。四月初六日。郎談率兵出大同之德勝口。駐兵歸化城。五月初六日。奉

日奉

旨遣侍讀學士達湖。護軍叅領諾里孫。達密納。誇子。蘇丹。古禮哈等。共赴軍前効用。併傳

旨郎談往查甘肅諸邊。此行可帥西安護軍叅領八人。

寧夏總兵涼州甘州叅將遊擊肅州總兵等。去邊二  
三日路。細察形勢。若西安將軍副都統等來請安時。  
傳旨責備之。伊等目覩巴圖里濟農遁去。有何顏面  
立於人世。閏七月。學士達湖等至營。郎談卽率衆往  
查邊。二十五日。至阿蘭善山。卽叛賊巴圖里濟  
農所駐處。郎談料其黨衆尚有存者。率總兵馮  
成德。副都統索鶴等。領勁兵三百騎。布圍搜山。  
果遇十九騎。呼之不應。俱生擒。問之。果巴圖里  
濟農屬人。寃巴圖里濟農所往。皆云不知。且拔  
刀起鬪。傷我官兵三人。併傷索鶴手腕。遂盡斬  
之。其馬匹器械。分賞中傷者。尋以偵探噶爾丹  
消息。業已遠颺。乃引兵還京。是年擢爲議政大  
臣。兼火器營總管。又陞爲領侍衛內大臣。三十  
二年三月初一日。

上諭郎談近聞噶爾丹乏食。有來哈密就食之信。哈密  
去甘肅諸邊甚近。不可不預爲之備。今特授爾爲昭  
武將軍。督大兵往甘肅駐防。凡軍機大事。可與西安  
將軍博濟提督孫思克商議而行。

特賜甲冑弓矢。纛韃寶刀。御鞍馬二匹。六月初九日。至  
甘州。旋具疏保舉人材。言臣自受

皇上知遇以來。才短任重。日夜憂懼。輾轉籌思。惟用衆成事。在舉人材。臣觀原任尚書覺羅舒恕。與原任前鋒叅領色禮古倫。二人今雖年老。其才猶足以用。伏乞任以副都統之職。使至軍前効用。於事必有裨益。六月二十日。又疏請養馬分兵。言臣按宣府大同官兵。雖人各得肥馬二匹。行三月不休。馬皆羸斃。臣行文與巡撫催送草豆。巡撫言已得青草。無給草豆之例。臣思天暑畜起。馬不精食。倘一旦有急。必致悞事。惜小費必妨大計。伏懇

聖旨必得兩月草豆。擇地精養。以備急用。再大兵駐扎甘州。天暑地窄。輸糧又艱。臣欲將總督標下兵三千。發回原鎮。將京中兵馬分於甘涼二處喂養。縱有機警。臣麾下精兵。孫思克標下兵。保無不足於用。疏上得

旨。並依所奏。六月。偵得噶爾丹消息。因上疏奏

聞。兼請進兵。言臣至甘肅。遂密派各處營堡官員。於南托賴河北坤都倫雅思圖烏斯都布楞宜禮等處。潛緝噶爾丹來哈密之信。未得其實。應令偵者深入。旋於五月十六日。遣遊擊戴玉領勁兵

百騎深入哈密境。六月二十二日，戴玉於苦水泉擒得八人，并其馬匹器械而還。臣同叅贊將軍博濟孫思克等細加訊問，八人皆云：聞噶爾丹遣衣特格爾圖、哈什哈等於四月至哈密城取糧，噶爾丹還駐科撲多五郎屋處屯田。又問噶爾丹與其侄策妄阿喇布坦相戰之事，皆云不知。又問兵有幾何，部落如何，云兵有四千餘人，部落甚窮困，牛羊殆盡，惟野掠捕魚而食。其言雖未可深信，然頗合於前者所聞。臣意噶爾丹雖上表乞降，其心叵測。俟來春馬肥氣和時，臣等率兵深入，將賊納進哈密諸部落盡取之。再遣人向噶爾丹取我叛臣圖克齊代陰厄里可等，則事變自生。於時臣等相機而動，事有可濟。倘緩年月，萬一噶爾丹叔侄連和，將難搖動。且蒙古部落中傳言噶爾丹行兵不可測，智謀不可窺，頗有搖動之意。若大兵深入，收哈密諸部落窘賊之勢，以振我軍威，則動搖者自安。賊迫欲交戰，適成擒耳。若其敗走窩集，臣等相宜追勦。俟其農時刈其野穀，收其部屬，絕其生路，縱以身免，自漸消滅。將數年梗化之頑寇，可收

功於旦暮矣。六月二十九日。疏下部議。部覆以爲危險難行。奉

聖祖特旨。此事所係甚重。將軍郎談等身在邊疆。或知此事易舉。機亦不可失也。且非急行之事。卽遣護軍統領蘇丹。侍郎席爾達。向總督佛倫。至將軍郎談。博濟。孫思克處。詳議具奏。復爲部議所格不行。先是西寧土司指揮同知李夏。奏請罷西海等處廟寺。與邊外諸蒙古納進白塔等處。邊外諸民。應遣入邊。各歸本境。部議令總督提督察議。

聖祖以總督佛倫。去其地甚遠。令郎談與提督孫思克。就近察議。郎談旋覆奏。臣等差官至西寧。同總兵官詳查此事。自順治十五年。因侍郎西圖同。昂厄會同諸蒙古台吉。議將托巴等諸寺廟諸番。給達賴等諸蒙古納進。明朝時未有此事。白塔等處居民。乃順治六年。因狃番丁國棟等作亂。懼罪逃於白塔等處。開田立舍。招聚逃亡。累至萬戶。西圖等爲此事。嘗至西寧察議。臣等愚意。內境百姓。不宜使居邊外。與蒙古納進。有關國體。宜盡宥其罪。悉移邊內。不然。恐日久釀成邊患。况當噶爾丹多事之秋。豈可置之度外。臣

已差人潛訪。此處人民背向真情。俟噶爾丹事畢之日。臣等先遣人諭蒙古酋長。設若不從。臣請以兵從事。再請

聖裁。七月。又疏請禁約喇嘛等不得任意出邊。並除異

端。言邊內非蒙古所居之處。塞口非喇嘛任意來往之所。番下愚民。無日不修廟寺。漸增至數千餘所。西海邊境諸民。盡衣赭衣。鮮事生產者。幾萬戶。臣意欲嚴令諸隘口官吏。不得令喇嘛任意出入。俾內地消息。洩於邊外蒙古。再邊內莊浪諸蒙古。易以民服。隨民納糧。以備兵餉。凡自古所有寺廟。應存留者。令焚修者。居之。其餘喇嘛愚民。任意蓋造者。宜悉毀之。驅游惰之徒。歸於田畝。則國賦充而游民少。俟噶爾丹平定後。再以李夏所奏事行之。庶不致震動邊陲也。三十三年。疏奏請除噶爾丹偵黨。言噶爾丹所屬部落。大西里羅卜藏等酋長。率鄂爾忒兵二百餘人。於嘉峪關外巴楞色勒河邊駐扎。云邊內李源堡所居紅番黑番等二千餘戶。乃彼之部落。每與納進。凡往達賴喇嘛處。或呼呼諾羅等處。及往噶爾丹等處。往來遞信。馬匹路費。皆



出於紅黑二番。其來久矣。臣欲回兵時。至色勒河邊。將大西里相機而動。以兵理之。將李源堡諸番。驅至莊浪閒地方。易其冠服。入籍播種。使納錢糧。如此。則賊之偵路隔絕。一方無虞。疏入。未及奉

旨。六月初十日。聞阿蘭善山外所居台吉奇齊克者遁去。卽令提督孫思克及總兵潘育龍等分地邀擒。復遣前鋒統領索鶴副都統阿納達等。遶邊城往追。邊外蒙古酋長巴圖禮濟農之子耶母春莽奈及前鋒參領達密納蒙鄂洛等。由領番諸邊邀截。本月二十二日。於奴爾格山追及之。招之不降。追兵擊之。並其黨巴雅克海桑皆斬之。獲其馬匹器械妻子以還。九月初四日奉

旨。噶爾丹既無消息。歸化城現有兵駐防。如或有警。從都中發兵。亦不甚遠。昭武將軍回兵可也。遂振旅而還。

賜宴於暢春苑。又

賜食菓二桌。三十四年四月初四日奉

旨。往察盛京諸邊。五月初二日。至八虎口疾篤。

聖祖特命其親族馳驛。同太醫院使孫之鼎馳往診視。

賜參餌等。五月三十日。郎談次子拉馨奉差還京。

聖祖卽諭拉馨馳驛往視父疾。朕坐待回音至。六月初二日。拉馨至八虎口。郎談以初九日卒於八虎口。年六十二歲。櫬還京。至通州。

特遣親軍侍衛官保海青五格。武大產賚。

御酒迎奠。

賜白馬二匹。帑金五百兩。

諭祭如典禮。子拉馨襲世職一等精奇尼哈番。歷任散

秩大臣。

蘇拜。吳拜第四弟也。年十五。從

太祖。高皇帝征蒙古。卽有功。十六擢任轄員。兼管牛朶章京事。天聰九年。從墨爾根代青貝勒多爾袞等。往收察哈爾部衆。入邊之日。遇明兵三百。擊敗之。并敗其伏兵四百人。崇德元年。從大兵征朝鮮。至桃山村。有敵兵相拒。蘇拜率轄員二十人擊破之。三年。隨貝勒岳樂征明。過北京。遇明太監馮永盛兵。奮勇先登。敗之。五年。征明。圍錦州。擊明松山杏山兵。凡六敗敵衆。又與圖爾格。葉克舒。詣錦州設伏。率八十人先行。敵兵來犯。追擊至河。敗之。敵人復進兵來戰。兩敗其衆。旋

師時身自殿後。盡獲所俘而還。是年敘功。授牛  
象章京世職。七年。復圍錦州。左右兩翼合師擊  
松山騎卒。蘇拜率本旗兵。敗敵有功。敵兵侵我  
紅衣礮。擊却之。復擊敗其左翼一隊。隨大兵進  
攻明。經略洪承疇三營兵。不違指授。以步戰敗  
敵。七年。加世職半個前程。八年。隨貝勒阿巴泰  
征明。入邊之日。擊明馬總兵。敗之。至山東。擊敗  
明范軍門吳總兵。馬步兵。攻樂安昌邑二縣。指  
揮我兵克其城。加授世職爲三等甲喇章京。順  
治元年。隨睿王多爾袞入山海關。擊流賊。二年。

議敘。加世職爲二等甲喇章京。又隨英親王阿  
濟格征流賊。鑿黃河水以濟。率右翼護軍追斬  
賊衆。其降者。與燾章京車爾布撫戢之。又同車  
爾布率師赴榆林。僞總兵率其所轄副將等。乘  
夜襲我大同張總兵營。鄂爾多斯蒙古潰遁。蘇  
拜與車爾布往援。深入賊陣。擊斬甚衆。枕藉溝  
壑。師旋。遇伏兵。復縱擊之。積尸盈壕。延安府賊  
兵七犯我營。悉擊破之。追流賊至湖廣承天府。  
獲船一百五艘。流賊第一營。倚谷結壘。蘇拜先  
驅衝入破之。李自成敗走。獲其金印。有僞劉侯

引兵來襲。又敗之。又擊破李自成第二營。躡跡至保塘。遇賊馬步兵。又破之。三年。加世職為一等甲喇章京。兼半個前程。隨肅親王。豪格征流賊。至四川。擊流寇八大王張獻忠。五敗其眾。五年。睿王多爾袞倚任之。超擢為三等精奇尼哈番。授燾章京赫白昂邦。

恩詔加世職為三等伯。固山額真。七年。緣事。盡削其世職。尋以蘇拜勤勞。宣力。給以原佐領。復補梅勒章京。加內大臣。領侍衛內大臣。仍以軍功所得一等阿思哈尼哈番授之。



